

# *HO TÈLA TSOHLE*

 Ho ka luloa fatše. Ke ne ke batlile ho le lumelisa bohole mantsiboea ana. Ke thabo ho fihla mona bosius bona. Ke monyetla oa motonana oona ho fihla mona, kerekeng e ratehang e ncha ena, ho rapela Morena. Esale re shebeletse hona, ho tla koano, nakoana, nakong ea bolekane le batho, le ho thabela mahlohonolo, le ho tsepia re tla le fetohela lehlohonolo lona batho ting. 'Me e re veke e sa tsoeletse joale, rea tseba seboka se tla latela joale, ho qala ka Labone.

<sup>2</sup> 'Me ke utloile thapama ena, ka Moena Williams, hore Labone bosiu re tla hle re makale. Moena Oral Roberts o tla ba le rōna, ho bua, Laboraro bosiu. E tla hle e be makalo ea tonana ho rōna bohole, kaha Moena Oral e hlile e le sebui se sefutho. 'Me ho tla ba hotle ho 'mona, ka bona, hape, ho tsukutla letsoho la hae.

<sup>3</sup> 'Me maobane bosiu keha re le Tempe, mane Assembly of God, kea kholoa ke eona, holimo mono. 'Me—'me ra hla ra nyakalla bosiu bo fetileng Tempe. 'Me re hlile ra nyakalla kerekeng e 'ngoe le e 'ngoe esale re e etetse mona tikolohong ea Phoenix, le holimo koana Tempe. 'Me re hlile re ananelia lintho tsena haholo, re batla re sa khone ho e hhalosa.

<sup>4</sup> Monyetla oona ke o fumana seoelo, ho kena bosiu ka bong kerekeng ka 'ngoe, le ho bua le batho le baena ba bareri. Hoo ho mpha monyetlanyana ho hhalosa kananelo ea ka ho batho bana, malumeli a fapaneng ana le lihlopha tsa batho. Hobane, ke eona, ke batshetshi ba baholo ka ntle tšimong, masimong a sele le hohle, 'me ka mokhoa oona nka thola monyetla ho hhalosa maikutlo a ka nqa bona, ka likananelo.

<sup>5</sup> 'Me esale ke hlotse le baikemeli le bo...kea kholoa, church of God, Assemblies, le e 'ngoe le e 'ngoe; 'me, mose ho maoatle, Foursquare, church of God, Assembly of God, le Jesus Name. 'Me, tseo tsohle, eka tsohle li fetoha ntho e le 'ngoe ha re kopana kopanong mono mabaleng a ntoa. 'Me, u a tseba, mona lapeng re tšoere mehopoloana eo e kang e fapanie, empa mabaleng a ntoa, khele, liphapang ha li eo. Ua bona?

<sup>6</sup> Ke holetse lelapeng le leholo. Bana ba le leshome. Ebe rōna bashanyana re tsoela ka morao ho jarete, re loantšane, oh, khili. Bashanyana ba leshome, ngoanana a le mong, 'me re hle re loane. Empa ho malimabe ea re oelang holimo, ka ntle jareteng e kapele, hoba, haeba ba oela a le mong holimo, ma—Branham oohle a hlaho ka makhalo oohle. Ke hopola bana ba Molimo ba le joalo, Kereke.

<sup>7</sup> Mona lilengoana tse fetileng, keha ke etetse Houston, re tšoere kopano e kholo. 'Me koo re le 'moho le...Keha ke tšeheletsoe ke ba 'maloa mono; Moena Raymond Richey, le—le

Assemblies of God, le e—le batho ba Jesu Name, le bohole ba fapaneng. Keha re tšoere kopano e kholo. 'Me re le koana Music House. Be, teng re lulise likete tse robeli, kea kholoa.

<sup>8</sup> 'Me teng ha hlaha e—e moreri oa Baptise eèna a batlile ho mphehisa ngangisanong, ka Bibele, ho thoe pholiso ea Khalalelo ha e a loka. Be, ke kopane le hoo ka makhetlo. Horeng o ka senya bosiu ka mosalumele a le mong, athe mono ho lutse likete tse ka rapelloang, u a bona? Eaba o e maneha pampiring, a ntialeha ke tšaba ho mo phephetsa.

<sup>9</sup> Eaba motsofe Moena Bosworth, mohlang oo a se a atametse lilemo tse mashome a robeli, a re, "Oh, ako ntumelle hle."

<sup>10</sup> Eaba ke hopola Kalebe, u a tseba, "Ntumelle ho hapa thaba ena." Ka baka leo ka re, "Moena Bosworth, ha ke—ke batle ha u ka pheha khang. Kreste ha batle ha rôna Bakreste re pheha khang. Haeba monna e le mosalumele, khele, ke mosalumele feela, ke phetho. U ke ke ua etsa letho ka eona."

<sup>11</sup> 'Me ka hona a re, "Be, seo e leng sona," ho re, "haeba re ka tsamaea, hoba ba e maneha pampiring," ho re, "ba tla re tlaleha re le mphi ea, u a tseba, ha re tsebe seo re buang ka sona, re fuluhile maikutlo feela." A re, "Ekare u ka mpha monyetla." Eaba ke mo sheba a eme mono, a batla a le lilemo tse mashome a robeli, 'me a kholisehile ka Lengolo leo.

<sup>12</sup> Ka re, "Be, Moena Bosworth, haeba u ka ntšoara ka letsoho la hao oa ntšepisa ho se ngangisane."

<sup>13</sup> A re, "Oh, nke ke ka pheha khang." Eaba o theohela mokatong o ka tlase, ho bolella moqolotsi oa litaba.

<sup>14</sup> 'Me ehlile, le tseba kamoo lipampiri li ka e fofisang kateng, ua bona. "Mohoete oa borapeli o tlil'o fefoha," u a tseba.

<sup>15</sup> Ra fumana setadiamo, lekote le hatikeloang leo, 'me bosiu boo ra fumana batho ba ka etsang likete tse mashome a mararo. 'Me mono ha bontša, batho ba tlile ka lifofane, literene. Kea le bolella, ba kaletse likamele tsa selota se le seng, likamele tsa lilotsta tse peli, le likamele tsa lilotla tse tharo, empa bohole keha ba enoa selibeng seo re neang sebaka bohole, ka ho tšoana. Ntho eohle e kopane. 'Me ea ikela...Ke sa tsoa fumana lehlohonolo le leholo mono, ho nahana seo joale. Ua bona, mohla khatello e fihiang ka matla, ra thea ntlha e le 'ngoe ea teanelo, bohole re ne re lumela ho Moea o Halalelang le pholisong ea Khalalelo. Eaba mang le mang o fihla ho nehela seabo sa hae.

<sup>16</sup> Ka hona re tseba se hlahileng bosiusg boo, Moea o Halalelang oa nka taolo. 'Me ke mohla Lengeloi la Morena le ne le theoha. Ba ile ba nka foto ea eona. 'Me—'me ea ntano tloha mono ea isoa Washington D.C., ho nepahatsoa. Eaba, ka morao ho mono, e fetisoa litekong le linthong. 'Me George J. Lacy, hlooho ea FBI, o ngola e—e tokomane ka eona. Ebile eèna ke hlooho ea litokomane tsa menoana tsa e—tsa FBI. "E ne e hlile e

le Boleng bo mohlolo. Leseli le otlide lense. E ne e se saekholoji.” A re, “Esale ke tlaleha likopano tsa hao e le saekholoji, ka bona. Ke itse u balile kelello ea batho bao.” A re, “Empa leihlo la mochini oa khamera ha le katlatse saekholoji, Mongh. Branham. Le otlide lense.” A re, “Le teng mona.”

<sup>17</sup> Ka baka leo, ke hona, Le fotiloe. Le kile la fotoa pele ho moo, le makhetlo a ’maloa ka morao ho moo. Feela, ke leboha haholo ho tseba. Batho ba bangata mona ba bone foto eo. Le lona ha ke re? [Phutheho e re, “Amen.”—Mong.] Kea khola, oh, bongata ba lona le e tšoere. Ke thabile ho tseba hoo.

<sup>18</sup> Leha koana ho builoe khafetsa ka motsamao oa pentekosta letsatsing lena la ho qetela, empa, kea le bolella, ha u nka nalane ea Bibebe . . .

<sup>19</sup> Ke sa tsoa haola le e—e nalane ea kereke, lilemong tse ’maloa tse fetileng, ho qala lefung la moapostola oa ho qetela, Johanne, sehlekehlekeng sa . . . mohla a na a falla Sehlekehlekeng sa Patmose, le ho fihla ’me—’me a qetella ho ngola Libuka a ba a Li kopanya ’moho. A isitsoe mono kahobane a ne a nkile Lingoloa tsa baapostola a bopa Bibebe ka Tsona. E le lona lebaka la hae ho isoa Sehlekehlekeng sa Patmose. Ka mora ho belisoa mafureng letsatsi le bosiu, eaba o lelekeloa sehlekehlekeng. ’Me a teanya Libuka ’moho. Ntle le moo, Molimo oa mo nea Buka ea ho qetela ea Bibebe, eona Tšenolo.

<sup>20</sup> Eitse ha ke khutla, ka qala ka nalane ea hae mono, e ntano ba ho ea fihla ho ea hae . . . e mong oa balateli ba hae, Polycarp, Ignatius, le bao ba bangata, le ho theohela ho Martin, Irenaeus, Justus, Mohalaleli Columba, le ho haola, ho theoha ho kena mongoaheng o lefifi, le ho haola, le ho nyoloha ho kena ho—ho Lutheran, le Wesley.

<sup>21</sup> ’Me ke fumane hobane, ho qala matsatsing a baapostola, mesebetsing e meholo eo ea Moea o Halalelang, ha ho le a mong ea phatsimang ho feta motsamao oona oa Morena oa ho qetela, mona matsatsing a ho qetela. Ha re e elelloe, metsoalle. Lintho li teng tse etsahalang joale tse ka pakang Molimo, joaloka setšoantšo seo sa—sa Kreste, se nang le rōna hantle, mehleng eo ba hlokile thepa ea ho etsa hoo, matsatsing ao. Empa joale motho o leka ho sibolla ho hong, ho tlosa ho Molimo, athe Molimo o nka eona tšibollo eo a Ipake ka eona. Ka hona feela e . . . U ke ke ua eta Molimo pele, hoba Ke eamatlaohle, motlalahohle, mohlokaphelsetso. Ha ho mokhoa oa ho e balehela. Re mpe re ikokobetse feela re Mo sebeletse, ke bona bokhabane boo ke tsebang ho bo etsa.

<sup>22</sup> Ke soabile, empa ha ke kholoe ke tseba lebitso la molisa, oa kerekeng mona. Ke . . . [Moena Griffith o tsebisa lebitso la hae—Mong.] Moena Griffith, ke hlile ke thabetse ho kopana le uena, moena, le nako ea ho tla koano le botsoalle, ho ba ’moho le uena, ho . . .

<sup>23</sup> Kamehla re rata ho e hhalosa tjena, ho bao ba jakileng Sunnyslopes, hobane mona re bafeti, baeti. Re bolela lena e se lehae la rōna. Re lipēo tsa Abrahama, “Re batla Motse oo Moahi le Mothei e leng Molimo.”

<sup>24</sup> Ena ke naha e ntle. Ha ke kholoe tulo e tšoanang le eona e le teng, eo nkileng ka e bona. ’Me ke hahlaula sechaba ka seng lefatšeng, ’me ha ke eso bone letho Europe, Italy, Asia, hohle Bochabatsatsi, le ka ipapisang le Phoenix, Arizona. Joale, eo ke ’nete. Ke tulo e fetisang ka botle eo nkileng ka e bona. Empa, oh, e tla ka pachisi, papisong le se tla hlaha Mileniamong o moholo. Ka baka leo rea—rea...

<sup>25</sup> Lena ha se lehae la rōna. Mona re mpa re jakile feela, ’me re tlie ho tšoara setsoalle sena ’moho.

<sup>26</sup> Ho ’na ke lehlohonolo ho fihla koano le ho bona kereke ea Molimo e ntse e atleha, ka moaho o mocha, le ka lintho tse joalo. Molimo a le hlohonolofatse ka mehla! Le tšepahale ho Kreste. Le tiisetse ho molisa ka ’nete, le sebetse ’moho, e mong le e mong letsoho—ka—letsoho, kaha ke lumela ho Khutla ha Morena ho atametse.

<sup>27</sup> Joale, pejana re atamela Lentsoe, ha re atameleng Mongoli ka thapelo, re sa inamisa lihlooho tsa rōna nakoana feela.

<sup>28</sup> Pejana feela re rapela, ka lihlooho tsa rōna le lipelō tse inamisisoeng, na kopo ea thapelo e teng mona, ’me u ka e tsebisa ka letsoho le phahameng, haeba u hloka letho pelōng ea hao, le ho re, “Morena Jesu, nkhopole hle”? Morena o bona letsoho ka leng. Ke tiiile.

<sup>29</sup> Ntata rōna oa Lehlimo, re thabile haholo ho U bitsa “Ntate,” ’Mopi e moholo oa maholimo le lefatše, Elohim e moholo, El—Shaddai, Moaba—Matla, Mofepi, Rabokhoni—bohle. ’Me ka Mora oa Hao ka sebele ea ratoang, O re boleletse: haeba re ka tla ho Uena, ra kopa letho, ka ho sebelisa Lebitso la Hae, O tla hlakomela hore le abjoe. ’Me, Ntate, hoo re ho lumela ho theiloe holim’ a mabaka. Efela ha re kopa letho le phoso, re ke ke ra ba le tumelo ho lumela hobane e tla arabeloa. Empa ha re ka hlahloba lipelō tsa rōna bosius bona, re sa kope letho le phoso, empa le lokileng, ke hore, U tle u re tšoarele libe tsa rōna tsohle le littolo, hoba ruri, Morena, eo ke ntho ea pele.

<sup>30</sup> Ha re batle ho leka ho kena ka pel’ a Sefahleho sa Hao sebe se lutse holim’ a rōna. Ka baka leo, re tseba hoo, letsatsi ka leng, re tšoasoa ke mathata le lintho, tseo mohopoloo oa rōna o sa li eleng hloko, empa, ha re nahana ka Molimo o halalelang, Oo esita le Mangeli a leng litšila mahlong a Oona, ke moo re tsebang, Morena, re itseba re se na le monyetla ha re sa tle ka Mali a Jesu Kreste, ke moo re leng bana ba Molimo. Liphoso tsa rōna li tlolisoa mahlo, ha re ntse re li bolela.

<sup>31</sup> 'Me kea rapela, bosiu bona, Ntate, hore U tle u hlohonolofatse phutheho ena e phahamisitseng matsoho a eona. U tseba se ka morao ho nong ho larile ka morao ho matsoho ao: mohopolo, takatso, le—le morero le sepheo sa ho a phahamisa. Ke U kopa ho aba kopo e 'ngoe le e 'ngoe ea bona.

<sup>32</sup> 'Me joale, Ntate, re rapella kereke ena. Re thabile haholo, hono, sebaka sena. Re balile morao litšiung tse qalang, mono Bakreste ba ne ba h louoe haholo, ba sa khone le ho fumana kereke. Hono, ba futsanehile haholo, ba sa khone le ho aha e 'ngoe leha ba e fumane, le ho bona hoo kapa ho fumana monyeta oo. 'Me joale, kajeno, ho bona boholo, meaho e meholo e nyolohang, e hloekileng, moo batho, ba ka kenang ba rapela Molimo. Hona re ho lebohisa haholo. Le ka sehlabelo seo, batho, ka karolo ea bona ea leshome le ka liabo le—le ka monehelo, ba ahetseng Morena ntlu ena.

<sup>33</sup> Joale, Ntate, Molimo, ke U rapela ho hlohonolofatsa molisa oa eona, bahlanka ba eona, literaseti tsa eona, le setho ka seng se kenang mona. E ke e hole, le ho hola, le ho hola. 'Me ho ke ho etsoe, kerekeng ena, ho qale tsosetso ea mehla ea khale e tla haola le phula, ho tsoella le ho tsoella. Kerekeng ena ho tsoe mehlolo le meeka, ea pholiso, pholoso. E fetohe ntluleseli sechabebg sohle. Aba sena, Morena.

<sup>34</sup> Sebakeng sena, ho tsoe, bareri ba khabane, banna ba bacha, ba kakatletse pitso ea Molimo bophelong ba bona, ho ea mabaleng a boromuo, hohle moo ba ka biletsoang teng. Aba sena, Morena.

<sup>35</sup> 'Me bosiung bona, re sa phuthehile mona 'moho, Moea o Halalelang o ke o fihle, o kene Lentsoeng, le ho jala Peō pelōng ka 'ngoe e ka mona. Re ke re E nosetse ka tumelo, motšeare le bosiu, ho fihlela E hotse e fetohile lifate tse kholo tlotlisong ea Molimo.

<sup>36</sup> Folisa mang le mang ea kulang, Morena, ea leng teng mona bosiung bona. Pholosa motho mang le mang ea lahlehileng. Ako khutlise bohle ba ngalileng. Le ho boela ho tlatsoa ba seng ba kile ba tlatsoa pele. Aba sena, Morena, hobane re kopa sena ka Lebitso la Jesu Kreste, Ngoana Hao. Amen.

<sup>37</sup> Joale, ke batla ke siiloe ke nako, ka tloaelo. Ho tla koano mona ho bile hole ho feta kamoo ke neng ke lebeletse.

<sup>38</sup> 'Me ka hona rona, hosane bosiu, re sebakeng se seng. Kea kholoa ba se ba e tsebisitse. 'Me joale, haeba u ena le kereke mono e leng kereke ea hao mona, hosane bosiu, u se ke ua theoha. Empa ha u se na kereke, re ka thabela ho ba le uena. Kamehla re thabela ha batho ba lula litemeng tsa mosebetsi oa bona, ho sa tsotelehe. Ha kereke e butsoe, lesole ka leng le tšoanelo ho ema seemeng sa lona le tulong ea lona.

<sup>39</sup> 'Me mona re etile re kene monyakeng o moholo, pejana feela ho—ho seboka sa Banna Borakhoebo. 'Me ke se ke tsebisitse, Moena Roberts o tla fihla koano ho bula tšebeletso, bakeng sa bosiu ba Labone. Re tla thabela ho kopana le Moena Roberts. 'Me hape kea nahana, e ka ba Labohlano, Moena Velmer Gardner o tla fihla mona. Ha ho tsejoe haeba a tla bua bosiusing boo, kapa che.

<sup>40</sup> 'Me ke kholoa ke laoletsoe, ho fihla mona Moqebelo hoseng, borakefeseng. 'Me haele thato ea Molimo, 'me ke tlameha ho bua Moqebelo hoseng, ke batla ho tšoarana le sehloho, haeba ho ka etsoa, haeba e le thato ea Molimo: *Monna Ea Khopo—khopo Eo Nkileng Ka Kopana Le Eèna*. Ka hona, le—le hape, thapama ea Sontaha, ke tlameha ho boela ke bua. Ka hona haeba u... Joale, hoseng ha Moqebelo, ha ho kereke, kamoo ke tsebang. Le thapama ea Sontaha ha ho kereke, ho latela tsebo ea ka.

<sup>41</sup> Joale, pele ke qala, ke lebetse hore ke se ke... Che. Kea lumela Billy o itlalehile a ntšitse litlankana tsa thapelo kaofela. Na ho joalo? Ana litlankana tsa thapelo li ntšitsoe mona bosiusing bona? Be, o ntšitse karolo ea tsona, kerekeng e 'ngoe, bosiu bo fetileng, hobane esale ke—ke tšoarella batho halelele.

<sup>42</sup> Ke batla ke rera halelele, lihora tse tšeletseng kapa tse robeli, ntho e kang eo, ka linako tse ling, ka nako ha ke fulueha. Joale, ha ke... Bosiusing bona, ha kea ikemisetsa ho rera halofo ea hoo. Feela... Ka hopola re ka aba litlankana tsa thapelo, ebile hape re... le ka khutlela hae ka bo khitla ea bosiu, le hona, hoba re tšoarane le mola oa thapelo. Ka hona, haeba e le halofo ea hoo. 'Me ha ke tsebe ha kaalo, empa ke nka nako e telele ho bolela seo ke se tsebang. Ka hona, seo ke se tsebang, ke rata ho se bolela ka makhethe ana, 'me ke nka nako ka eona, u a tseba. Ke botle. Mono ke ne ke mpa ke soasoa, hoba ke—ke tla leka ho tsoa, metsotsong e mashome a mane a metso e mehlano, kapa ho hong, ho isa moleng oa thapelo.

<sup>43</sup> Ke tšoere nthoana, Lengolo le le leng mona leo ke batlang ho le bala bosiusing bona, le ho qotsa sehloho, 'me ke rapela Molimo ho se sitsa. Ha le batla ho le bala ha le fihla lapeng, le ho Mareka, khaolo ea 10 le temana ea 28.

*Eaba Petrose o qala a bua a re ho eèna, Bona, rōna re tlohetse tsohle, 'me re u latetse.*

<sup>44</sup> Joale, ke rata ho qotsa sehloho, ho aha therò mono, sa: *Ho Tèla Tsohle*. Ebile hape, metsotsong e 'maloa, re tla rapella bakuli. 'Me joale, lona ba tsebang Mareka, khaolo ea 10, motheo oa eona. Feela... E ne e le Jesu ea buang, pele, ka hlalo.

<sup>45</sup> Eaba O hlaheloa ke ntho e hlollang. Mohlankana o ne a tle ho Eèna a matha, ha thoe, "Moruti ea Molemo, ke tla etsang ke tle tle rue Bophelo Bosafeleng?"

'Me A re ho eèna, "Keha u boloka melao."

<sup>46</sup> Mohlankana a re, “Sena ke se bolokile, haesale le bonyenyaneng ba ka. Kapa, ebe ke melao efe eo?” Eaba O ‘molella eona. A ntano re ho eëna, “Sena ke se ke se bolokile.”

<sup>47</sup> A re, “U hloka ntho e le ’ngoe. Ha u fela u batla ho rua Bophelo Bosafeleng, u be u phethehe, tsamaea u rekise ka tsohle tseo u na le tsona u li fe bafumanehi. U ntano tla u Ntatele u ipelesitse sefapano sa hao.”

<sup>48</sup> Ha re saleng mohlankana eo morao nakoana pejana re kenella sehloho sa rōna, e le ho aha motheo.

<sup>49</sup> Joale, u a bona, mohlankana eo o kopiloe ho tèla tsohle, a mpa a hana. ’Me ka linako tse ling haeba re amahantša ho ateloa le maruo, le lintho tse joalo e le eona, “katleho,” empa mohlankana enoa e ne e le mohlankana ea atlehileng feela a ntse a sa rua Bophelo Bosafeleng. Ka baka leo, ka linako tse ling, ha se ka mehla katleho e lekanyang t̄sitsø ea Molimo.

<sup>50</sup> Empa ha re mo saleng morao. Re mo fumana mona mehleng ea bocha ba hae, mocha, mohlomong e le tjaka, a le mocha, mothaka ea apereng. Bibele e boletse, ho itsoe, “Jesu a mo rata.” O tlamehile a be a ne a lokile, a le mosaa, letsoalo la hae le le bonolo. O tlamehile ho rua e—e ho lokileng, ho seng joalo a ka be a sa tsotoa ke Morena Jesu. Hobane, eitseha Jesu a mo shalima, “A mo rata.” O tlamehile a be a fupile t̄sobotsi e mosaa, le chebeho e khabane, monna oa boitšoaro, moshanyana ea betliloeng hle. ’Me eaba o atamela Jesu, koana a ntse a nahana, ka botšepehi, ha thoe, “Ke rata ho tseba seo nka etsang ho rua Bophelo Bosafeleng.”

<sup>51</sup> Eareha a tlameha ho tlohela tseo a li ruileng, hore a tle a rue Bophelo Bosafeleng, ebile moo potso e fihlang monyako, ana u ka khona na. Ebile potso eo e hlönngoe pela mang le mang oa rōna. ’Me Jesu a hla a mo kopa ho tèla tsohle tseo a li ruileng, ho ipelesa sefapano sa hae, le ho Mo latela. Athe ebile re tseba pale eo. “Eo a mpa a ikela a soabile, hobane e ne e le ea nang le maruo a maholo.”

<sup>52</sup> Ebile Jesu o reteleha, a re, “Ho ea ba thata hakakang ho ba nang le maruo ho kena ’Musong oa Leholimo, ho ka ba bonolo ha kamele e ka feta ka lesoba la lemao. Empa ke ntho e sitang motho, empa,” A re, “empa ha e site Molimo.”

<sup>53</sup> Ha re saleng mohlankana enoa oa ’musisi. Khetlo le latelang ha re mo fumana, ka hara Bibele, a se ke a... hang hoba a nyahlatse monyetla oa ho latela Jesu, hoba a e tsepamisetsoe ka thata.

<sup>54</sup> Ua bona, re batla ho hamarela sohle seo re ka se khonang, re ntano latela Jesu. Empa ka linako tse ling Jesu o re batla re tlohetse tsohle, re tle re Mo neele matsoho a mabeli. Ka linako tse ling re nahana joalo, hore—hore kahobane feela re fumane.

<sup>55</sup> Hoo ho nkhopotsa taba eo ke tloaetseng ho e phetha, e amana le banana ba ka ba babeli. Hajoale ha ba sa le le

banyenyane, 'me ke banana ba seng ba hlile ba itekanentse. Empa, enere ba sa le banyenyane... E mong oa bona ke Rebeka; ke e moholo. Athe, Sara, ke e monyenyane. 'Me mahlo a Becky a boputsoa ba leholimo, athe a Sara a masothoana. Empa bobeli ke bananyana ba ntate, ua tseba. 'Me ba nkemela ho fihla ke khutletse hae, ba hlile ba rata ho mpona ka mehla. 'Me Becky o batla a le... o ne a batla a le molelele, e batla e le ngoanana e mosesane. Atha Sara eèna a le monyenyane, a batla a le mokhutšoane, mothoana ea sa tsebisahaleng.

<sup>56</sup> Eaba ba nkemetse ho fihla lapeng, bosiu bo bong. Esale ke ile likopanong, 'me ba tsebile ke tla fihla, eaba ba hopola ho ema nakoana. 'Me haeba ke fihla hae, ba ne ba batlile ho mpona. Be, eka ralehlabathe o ile afafatsa mahlo a bona ka lehlabathe, eaba ba otsela. 'Me qetellong ba ea robala, ba kena phaposing ea bona.

<sup>57</sup> 'Me 'na ka fihla ka kena hamamorao. Eaba kea kena, ke hlile ke khathetse, ka ea liphateng. 'Me ka morao ho likopano, le lintho tse joalo, ke khathala hoo ke sa khoneng ho robala, ka mora likopano tsa liveke tse 'maloa. Eaba ke robala lihora tse peli kapa tse tharo, ka tsoha, ka kena—ka kena phaposing ea ho phomola, ka itulela setulong feela. Eaba ke lutse mono setulong, hoseng haholo ka meso.

<sup>58</sup> 'Me ka mora nakoana, Becky a phethoha, ka phaposing ea hae ea ho robala, a re phapha e se e le motšeare. 'Me a sheba ka holong, a mpona ke lutse mono setulong. A tsoa moalong, ka potlako hakaalo, meongoana eo, e mesesane, e melelele e hlile e hlabeletsa.

<sup>59</sup> Be, hoo—hoo ha raosa Sara. 'Me ha ke tsebe haeba bana ba lona ba etsa hoo, kapa che, empa, khele, ha u rekela e moholo nthoana, e apoleloa oa bobeli. 'Me Sara o ne a apere lipijama tsa Rebeka, maoto a hlile a habusela, ua tseba, li hlile li mo feta ka boholo. 'Me, eèna, eaba o tsoa moalong, maotohali ao a fefofa. 'Me a batla a sa khone ho tšoara Rebeka.

<sup>60</sup> Eaba Rebeka o a mo siea o fihla ho 'na pele. 'Me eèna a qhomela holima ka, a nkopela ka liphaka tsa hae tse peli, ka mokhoa feela... O ne a lutse lengoleng la ka le letona, 'me meomo e melelele ea hae e leketletse fulurung. A hlile a ikokotletse hamonatjana.

<sup>61</sup> Taba eo e batla e nkhopotsa mekhatlo e meng ena e meholo e fihlileng pele, u a tseba, e ileng ea fihla. U a tseba, khale e le mona, e batla e le meomo e melelele, le lintho tse joalo, e ikokotletse hamonatjana.

<sup>62</sup> Sara ke enoa a etla, mothoana, kereke e ncha, u a tseba, ha eso khathe tema hakaalo. A bona hobane Becky o mo siile—o mo siile mono.

<sup>63</sup> Keha Rebeka a nkopetse ka liphaka tsa hae. A qamaka koana le koana. A re, "Sara, khaitseli ea ka, ke batla u tsebe taba ena." A re, "Ke fihlile pele mona." 'Me a ntano re, "Ke

nkile ntate kaofela, athe uena ha u a salloa ke letho.” (Ba leka ho rialo ho rōna, u a tseba, ka linako tsohle.) Ha thoe, “Ke fihlile pele mona, ’me ke nkile ntate kaofela, athe uena ha u a salloa ke letho.”

<sup>64</sup> Sara oa batho a kebisa hlooho ea hae. Melongoana ea hae ea tlerebana. A tloha a ikela, likeleli li se li kolletse mahlong a maholo ao a masoothoana. Keha Becky a robalitse hlooho ea hae lehetleng la ka, a batla a nkopetse.

<sup>65</sup> Ka thanya monoana oa ka *joalo*, ke qhoaera Sara, ka nama moomo o mong. Ke enoa a e tla, a qhomela holima moomo o mong, ’me, khеле, a—a—a batla a sa khone ho ikokotlela. Meongoana ea hae ea haella ho fihla fulurung. Empa o ne a hloeletse moomo, leha ho le joalo. Ua bona? Ka hona a ’na a kolokoteha *joalo*.

<sup>66</sup> Be, ho mo thibela ho oela fatše, ka ntša liphaka tse peli ka mo kopela ke mo sikara haufi le ’na, ka mokhoa *oo*, ho mo tšoara. ’Me eaba ke mo sikile haufi le ’na, ’me eèna a tsetleha hloohoana ea hae ka ’na nakoana.

<sup>67</sup> A phahama a sheba Becky, le ho re, “Joale, Rebeka, khaitseli ea ka,” ho re, “le ’na, ke batla ho u bolella taba.” A re, “Mohlomong uena u sikile ntate kaofela, empa ke batla u tsebe ho u tsebisa ’na ntate o ntšikile kaofela.” Ehlile bo ke eona.

<sup>68</sup> Re hlile re e batla e le joalo. Ha re batle... Re Mo batla a re sikile kaofela ha rōna. Ka baka leo, ha ho le joalo, linthong tsohle, ho etsa hoo, re tlameha ho tsoela koo ka tumelo re lumele ho Eèna, ke phetho, le ho tšepa. Ha re khone ho e hhalosa. Mokhoa oa ho e hhalosa ha o eo. Re mpa re e lumela, re e amohela joalo.

<sup>69</sup> Monna e mocha enoa oa morui, o ne a hane ho inehela Kreste, eaba o tloha a ikela. ’Me re mo fumana, hamorao, a se a... A ile a ateloa haholo, meliko ea hae ea ba ea phophoma, a ba a re, “Moea, ako iphomolele.” Oh, keha a atlehile, ntho eohle. Keha a atetsoe hona, a sa hloke letho.

<sup>70</sup> Empa ha etsahala ho hong. Khetlo le latelang ha re ’mona, o lelatsta mahlo a hae liheleng, a bonela mokopi hole koana sefubeng sa Abrahama. Kaha a hanne ho tèla tsohle, ho latela Morena Jesu.

<sup>71</sup> Hoba, hona ho hlahe, hoba mohlankana oa morui a hane ho tèla ling tsa hae, ho latela Jesu, eaba Petrose o hlaketsoe. Ke kholoa e le eèna ea kileng a rialo, kapa ea botsitseng potso, ea e tsositseng. Le ho re, “Joale, rōna re tètse tsohle, ho U latela. Rōna re tètse tsohle. Sheba seo re se entseng. Re tètse mahae a rōna. Re tetse malapa a rōna. Re tètse masimo a rōna. Re tètse sohle seo re kileng ra se rua, ho U sala morao.”

<sup>72</sup> Eaba e qala e mo chabela. Koana ekaba esale a patisitsoe ke mosebetsi, a ntse a beile Kreste leihlo, le lintho tse kang

tseo, tseo a . . . Eso mo chabele pele, hore o tètse lehae la hae. O tètse leloko la hae. A tètse ntatae, 'maè. A ile a tlohela tsohle, ho latela Jesu.

<sup>73</sup> Empa ehlile Molimo o hloka hona hoo: ho tèla tsohle le ho latela Eèna. Ke eona tlhoko ea Molimo eo. Le rôna re tlameha ho etsa hona hoo. Ka linako tse ling re tlameha ho tèla mehopolo ea rôna hape. Ha mehopolo ea rôna ka eng le eng e hohlana le Lentsoe la Molimo, re tlameha ho tèla mohopolo oa rôna re latele Eèna. 'Me mokhoa o le mong ho Mo latela ke ka ho latela Lentsoe la Hae, ho Le mamela. 'Me qelo ea Molimo le tlhoko ea Molimo ke ho tèla tsohle le ho latela Eèna.

<sup>74</sup> Empa ka ho etsa hoo, re fumana, ka linako tse ling, re tlameha ho tèla metsoalle ea rôna. Hangata ho thata ho etsa hoo, joale, batho ba bangata, mohla ba ne ba kena ka ho Kreste khetlo la pele 'me ba tlatsoa ka Moea. Ha re re, joaloka basali, ba kileng ba lemalla ho tsoa ba ea tšoara moketjana, bosiung bo itseng le bo itseng, teng ba bapale bunco tikolohong. Ba tloaelane le—le baahisane, le ba joalo, e le maloko a lisosaiti tsa tikoloho eo, ebe ba tsoela koo, ho bapala bunco. 'Me basali bana, u a tseba, ba tlil'o bua selo ka eona. Ba ke ke ba e utloisia. Empa, leha ho le joalo, u tlameha ho tèla ntho eo, kaha e se tšoanelo ho mokola, ho bapala likarete. 'Me u tlameha ho tèla hoo haeba u latela Kreste.

<sup>75</sup> Basali ka linako tse ling, ka likerekeng tsa rôna, ba lemalla ho apara liaparo tse manyala, tse kang lishotso, le—le li—dungaree tsena. Athe Bibele e boletse, "Ke manyala ho Molimo, ha mosali a apara lintho tse joalo." Eèna, ho sa tsotelehe seo a se nahanang, o tlameha ho tèla seo. Ka linako tse ling re fumana basali, mohla ba ne ba kena Tseleng 'me ba pholosoa, ba ne ba lemaletse ho kuta moriri oa bona. 'Me ba batla ho tuma selefatše. Empa ba e fumana, e le bothata, kaha ba tla u bitsa motho oa sekhaleng, ha u apara Sekreste, u itšoere Sekreste, u phela Sekreste. Ba tla u bitsa motho oa sekhaleng, empa u tlameha ho tèla hoo hohle, ho Mo latela.

<sup>76</sup> Jesu o boletse, kapa Lengelo le rialo, "Ea ratang lefatše, leha e le lintho tsa lefatše, lerato la Molimo ha le a aha ka ho eèna." Hantle. E qosa, ho tèla tsohle.

<sup>77</sup> Mono, ha u ikemiselitse ho tèla tsohle le ho Mo latela, eba, "Haeba le lula ho 'Na, le Lentsoe la Ka le ahile ka ho lona, le ka kopa eng le eng 'me le tla e etsetsoa." Empa, u ke ke ua khona, ha u tseba lintho tseo li fosahetse. U li tseba li le phoso.

<sup>78</sup> Bibele e khahlano le tsona: ho bapala likarete, ho tsuba sakrete, ho noa, ho apara liaparo tse sa hloekang. 'Me, hape, u ntse u ipitsa Mokreste. Ekare ha moea o ahileng ka ho uena u sa ahlole lintho tseo, phoso e teng ka moea o ahileng ka ho uena. Hobane, Molimo O ngolileng Lentsoe ke Lentsoe. 'Me Lentsoe le ahile ka ho uena, 'me Lea u ahlola. Le tlamehile

joalo. 'Me haeba le sa etse hoo, u ntse u thetsitsoe. Na ebe Moea o Halalelang o ka ngola selo, o ntano hlanoha o ema khahlano le Oona, ebe u itlaleha u tsamaisoa ke Moea o Halalelang? U ke ke ua khona. Ka hona, ho tsuba lisakrete, ho noa wiski, ho bapala likarete, ho kuta moriri, ho tena lishoto, lintho tse ling tsena tsohle, li phoso, ke liphoso tse tletseng sebe, 'me pele u e tela u ke ke ua tsoa tema.

<sup>79</sup> E ntse e khasetsa ka hara metsamao ea rōna ea Pentekosta. Lihlong. Le tlameha ho hlajoa ke lihlong. Ha re makale re sa khone ho tšoara tsoseletso e eang ka lefatše lohle. Ha re makale re sa khone ho tšoara tsoseletso ea pentekosta. Ntho e 'ngoe e hlahile. Ke hantle. Re lahletse marapo, 'me ho hlaha lintho tse sa tšoanelang ho hlaha. Ka baka leo u tlameha ho tela tsohle, ho latela Kreste.

<sup>80</sup> U tlameha ho itèla bo—ueno, menahano ea hao. U tlameha ho nyallana le Lentsoe la Hae. 'Me Moea o Halalelang o ke ke oa latola Lentsoe lefe O kileng oa le bolela. 'Me Bibele e ngotsoe ke Moea o Halalelang. Bibele e itsalo. 'Me haeba... Mantsoe a Bibele ke Molimo. "Lentsoe le ne le le tšimolohong, Lentsoe le ne le le ho Molimo, 'me Lentsoe e ne e le Molimo. 'Me Lentsoe le ne le etsoe nama la aha hara rōna."

<sup>81</sup> Joale Lentsoe le entsoe Moea, le ahile ka ho rōna, "Hoba Ke tla ba le lona, le ka ho lona, ho isa bofelong ba lefatše, qetellong." Joale, oona Molimo o ngolileng Bibele o ahile ka ho uena. Ha esale uena. U shoele nqa lintho tsa lefatše. U shoele nqa mehopolo ea hao ka sebele, 'me mohopolo o nong o le ka ho... "Mohopolo o nong o ahile ka Kreste o be ka ho lona." Mono, ke hona ha u tèla lintho tsohle, ho Mo latela. E seng mehopolo ea hao; seo A se buang. "Ho se etsoe thato ea Ka; ea Hao, Morena." Ke mohla u qalang u tsepama le Lentsoe la Molimo.

Nka likoloha nako e telele mono, empa ke tla tsoa tema nakoana.

<sup>82</sup> "Empa," u rialo, "ke fumana'ng, ka ho tèla lintho tsohle? Ho tela tsohle, ebe ke fumana'ng?"

<sup>83</sup> U ka lebella lefatše ho u soma. U ka lebella lefatše ho u bitsolla ka mabitso a mefuta eohle. Ba tla u bitsa sohle seo ba ka u bitsang sona. U tla nyatsuo u be u hlobohuoe.

<sup>84</sup> Jesu, kahobane E ne e le Emmanuel, Molimo o ahile ka ho Eèna, eaba O fetoha moihoa ho kereke ea Hae ka sebele ho fihlela kereke ea Hae ka sebele e Mo lelekile hang hoba A kene ka hare. Ke bona ba Mo fehileng sefapanong. Ke bona ba Mo ahlotsgeng. O ne a rata batho. Pelō ea Hae eohle e ne e tsoela batho. Empa O ne a tlamehe ho tèla tsohle, a tle a latele Molimo.

<sup>85</sup> Le rōna re tlameha ho tèla tsohle, ho latela Molimo.

“Joale, ebe ke busoletsoa ka’ng?” Ha rea lebella.

<sup>86</sup> Ka linako tse ling ke hopola rōna bareri re e ntlafaletsa e—e mosokolloa haholo ka lipalesa. “Oh, ako tle ho Kreste hle, tsohle li tla babatseha.” Empa, u a bona, ha ho joalo, tseleng, puo eo e reng ke moseme oa boiketlo o lemetsoeng lipalesa. Hobane, ha ho Mokreste . . .

<sup>87</sup> Bibebe e boletse, “Bohle ba phelang ka borapeli bo leng ka ho Kreste Jesu ba tla oeloa ke lihloriso.” Ka hona haeba—haeba u sa hlorisoe ka lebaka la Kreste, phoso e teng.

<sup>88</sup> Haeba Liabolosi a sa u sala morao, o se a u tšoere. Ke phetho, hoba ha feela a u setse morao, ke sesupo sa hobane ha a eso u tšoare. Empa ha a sa u sala morao, ke sesupo sa hobane o u tšoere. Yaa. Hopola hoo ke hona, haeba a ntse a u thunyaka, le joale u sa mo etile pele ka likhato tse ’maloa, ‘me u ’ne u tsoelepele.

<sup>89</sup> “Empa bohle ba phelang ka borapeli bo leng ka ho Kreste Jesu ba tla oeloa ke lihloriso.” O itse, “Le thabe, le nyakalle ke hona, hobane ba hlorisitse joalo baporofeta ba ttileng pele ho lona.” Ke hantle.

<sup>90</sup> U se tsamaee ka sefahleho se tepeletseng, u re, “Be, hola ka se ke ka etsa sena. Kea kholoa, bao—bao, ha ke khone ho mamella litšebo tsa motho ka ’na, a re ke itšoere sekhale, ke sena, sane, kapa se *seng*.”

<sup>91</sup> Oh, u—u tlameha ho nyakalla ka nyakkallo e kholo, u thabe ke hona, ha u khonne ho jara sekhobo sa Lebitso la Hae. Le ka ho boloka melao ea Hae, e u etsisitse hoo.

<sup>92</sup> Empa ke batla ho bua sena, hape. (Ho potlaka, kapele kamoo nka khonang.) Molimo o ke ke oa khona, le ho leka, oa ba le molato le motho ofe. Molimo o ke ke oa ba le molato le motho. Haeba u etselitse Molimo letho, u tètse tsohle, Molimo o tla u putsa hasekete. Hantle. Molimo o tla khutla a e lefe. Ha u tèla lintho tsa lefatše, le lefatše, le lintho tsa lefatše, ke moo Molimo o tlang ho u putsa ho menahane.

<sup>93</sup> Lipaki tsa hoo li kae, mona bosius bona? [Phutheho e re, “Amen.”—Mong.] Be, bohle re tseba Molimo o tla putsa.

Joale ha re qotseng limelo tse ’maloa tse kileng tsa tèla tsohle.

<sup>94</sup> Ha re qotseng, pele, ntat’ a tumelo, Abrahama. Abrahama o ne a tèla naha ea habo, leruo leo a le ruileng, le ntho eohle. A bitsoa Kaldea, motseng oa Ure. Eaba o tèla naha ea habo, lehae la habo, batho ba habo, le tsohle, a latela Molimo. A tlameha ho tela sohle, ho e siea morao. O ne a tèla e—e naha ea habo, thepa ea hae tlase Kaldea, koana Ure. A tèla thepa ea hae, eaba Molimo o mo nea lefatše lohle la pallo. Molimo o lefa ka phaello e ngata. O ne a mo abele lona. Holimo mono tsatsi

le leng, mohla A ne a kopana le eèna, O itse, "Ema, Abrahama. Sheba bochabela, leboea, bophirimela, boroa. Ke u nea lona lohle. Ke la hao lohle."

<sup>95</sup> Ke bona bothata ba Bakreste bosiung bona. Molimo o re neile lona, empa re tšaba ho le batlisisa. Ha u fetoha Mokreste, u mojalefa oa tsepiso eohle e ka hara Bibebe. Ke hantle. Sohle seo Molimo o se tsepisitseng, ke sa hao. Ekare lehaha la levenkele le leholo, 'me ka Moea o le mong re kolobeletsoa bohole ka hara lehaha le leholo lena la levenkele, e leng Kreste. Be, haeba ke... Efela ha motho a u fa ntho, ke tlil'o qamaka ke shebe seo ke se ruileng.

<sup>96</sup> Ke hopola tlameho ea Bakreste bosiung bona e le ho etsa hoo. Ho fumana seo u se ruileng. Ha ntho e batla e le holingoana, ke sa e fihlele, ke tla ea lata lere ke e hloe ho e finyella. 'Me ha ntho e batla e le holingoana, ka hara Bibebe, eo Molimo a e tsepisitseng, ke tla lula mangoleng a ka 'me ke nyolohe lere ea Jakobo ho fihlela ke e qhautsa, hobane ke ea ka. Molimo o 'neile eona.

<sup>97</sup> Efela ha pholiso ea Khalalelo e tsepisitsoe ka Bibeleng, 'me ke kula, ke tla lula mono ho fihlela Molimo a mpho eona, kaha e le tsepiso. Molimo o tsepisitse hore ke tla tèla lefatše, O mpho Moea o Halalelang. Ke tla lula mono ho fihlela A mphile Oona, hobane A O tsepisitse. Haeba Molimo a ntsepisitse ho mpho takatso ea pelô ea ka, 'me takatso ea pelô ea ka e le ntho e nepahetseng, ke tla lula mono ho fihlela Molimo a mpho eona, hobane ke tsepiso. 'Me ke bile ke tetse lefatše lohle. Ke batla ho Mo sala morao, 'me O tla lefa. Hoo ke ho tseba e le 'nete. Ke hantle haholo.

<sup>98</sup> Eaba o etsa'ng? A tela lefatše la habo, naha ea habo. Eaba Molimo o mo nea profensi eohle, kapa ntho eohle, kontinente eohle ea e...ea Palestina. A tela sekotoana sa naha ea hae e nyenyane tlase mono, e ka ba akere moo ntlo ea hae e hlonngoeng teng, le ntlu ea hae ea khale, ho fuoa sohle se leng Palestina. Ke bottle.

<sup>99</sup> Empa ntho ea pele a tlameha ho ikarola. A ikarola bathong ba habo, ho baratuoa ba hae bohole, bomphato ba khale bao a neng a tloaetse ho—ho matha le bona, metsoalle ea boshanyana ba hae e tsoang Babilona, le eèna, le baena ba hae bohole, likhaiseli, le metsoalle ea hae eohle a e tsebileng, bomphato ba hae. Mohla Molimo o no o 'mitsa, O itse, "Ikarole mofuteng oa heno. Sutha ho oona kaofela." Joale, ho ne ho le thata, empa a ikarohanya le balekane ba habo bohole. Hobaneng? Hobane ba ne ba tla banana le eèna.

<sup>100</sup> Le re ba ne ba ka lumellana? Monnamoholo mona, oa lilemo tse mashome a supileng a metso e mehlano, ka mosali oa lilemo tse mashome a tšeletseng a metso e mehlano, ho thoe, "U a tseba ke'ng? Ke kopane le Molimo mona 'me O itse ke tla fumana e—e—e lesea joale, ka Sara."

<sup>101</sup> Khele, bao, motsoalle oa hae oa ngaka, a ka be a itse, “Monnamoholo eo o fapane hlooho.” Empa a se a rekile mamao oohle le maleiri, le ntho eohle, a ntse a itokisetsa lona, kaha a tsebile a tla le fumana. Ke hantle. Ha ho letho ho eona. Hobaneng? Molimo o e tsepisitse. Hantle. ’Me haeba sehlopha seo sa batho se batla ho mo tseha ’me ba mo hopola a lahlehetsoe ke kelello!

<sup>102</sup> Molumeli ka mong ba mo sebetsa joalo. Peō eohle ea Abrahama e fumana hona hoo. Ke hantle. Ka linako tse ling kereke ea hao e tla u leleka. Littlelapa, tsa libaka tseo u—u leng setho sa tsona, bolekane ba hao tikolohong, bomphato ba hao. Ka linako tse ling mochaufa oa hao kapa kharebe ea hao e tla nyahlatsa. Empa Molimo o u hloka ho tèla sohle, ho latela Èèna. Ho tèla sohle se khahlano le Èèna, le ho Mo latela.

<sup>103</sup> Joale, Abrahama, ka ho tèla batho ba habo, a buselsetsoa ka’ng? A ekeletsoa ka’ng? A etsoa ntata lichaba tse ngata. Molimo oa mo etsa ntata lichaba tse ngata. Nthoana a e tetseng, shebang na o fetohileng. Jesu o itse, “Ea tlang ho tèla...” Na, o tla neoa bontate, bommè, le ba joalo.” Shebang na Abrahama o fumaneng, ka ho tela sohle le ho Mo latela. E, monghali. “Ntata lichaba tse ngata.”

<sup>104</sup> Empa, pele, a tlameha ho ikarola ho se lumeleng hohle, esita le ho ikarola ho ea batang, ea fōfō, moena e leng setho sa kereke, Lota. A tlameha ho mo tèla, sebakeng sa hoo.

<sup>105</sup> Hohle ho loheletsoeng ho se lumele, u tlameha ho ikarola; eng le eng, haeba e le tumeloana, haeba u le ka hara kereke, ’me sohle seo u itšetlehileng ka sona e le tumeloana, u sa lumele Lentsoe, ’me haeba Lentsoe le le khahlano le... Tumeloana e le khahlano le Lentsoe, u tlameha ho tèla hoo. U tla tlameha ho tèla sohle.

<sup>106</sup> ’Me Molimo ha o a sitsa Abrahama pele a Mo mametsé ka botlalo. Abrahama o ne a batlile ho nka ntate oa hae, ’me monnamoholo eo esale e le ntsintsí mofehlelong, ka linako tsohle. Qetellong, a shoa. Eaba, Lota, ha hlaha khang le ntho eohle. ’Me hang hoba Abrahama a utloe Molimo ka botlalo a bile a ikarola, hoba a dumelle Lota ho theohela mono linaheng tse nonneng, hohle moo a batlileng ho ea teng, tlase Sodoma, eaba Molimo o itlhahisa ho Abrahama, le ho re, “Emisa mahlo a hao. Ntho eohle Ke u nea eona.”

<sup>107</sup> Abrahama e ne e le èèna ea ikarotseng. E ne e le èèna ea arohaneng, ho latela, ho latela Molimo. ’Me èèna ke ntata Tumelo. Ke èèna eo re mo lumelang e le ea tšepehang. “Pallo e ne e etsetsoe Abrahama le Peō ea hae. Rōna ba shoeleng ka ho Kreste re peō ea Abrahama, re majalefa ’moho le Èèna ka pallo.”

<sup>108</sup> Israele e ne e tlohele Egepeta. Ea tlohela mafatše a khale mono Egepeta. Ho amohela eng? Palestina. Ba tsoile tulong e tšabehang eo tlase mono Egepeta, batubi bao.

<sup>109</sup> 'Me batho ba teng kajeno ba bangata, basajana ka ntle mono seterateng, ba tsubang, ba noang, mokana re bone mona ho—mona radiong, tsatsi le leng. Mapolesa a ne a tlamehe ho tsoara basajana bao tlase mono, ka ntle seterateng, moea oo oa liabolosi o se o ba hlahafalitse, oa ba arubetsa ho chaea booglie—wooglie e ncha ena, kapa ebang ba e reileng, homme ka ntle mono seterateng, ba se ba hlanya kelellong ea bona. Ua bona? Ka nèpo, haeba mosetsana a ruile boitšaro bo kaa ka ounse, eèna kapa mohlankana, e ka bang mang, ba qhojoa ke motubi ho etsa hoo.

<sup>110</sup> Ako tèle hoo, ke moo Molimo a tläng ho u chaisa chao. Oh, khili! O hlile u tla e etsa bo. O tla u nea e 'ngoe, haeba u ka tèle hoo. Empa u tlameha ho tèle tseo tsohle, ho e rua. U ke ke ua khatha tema ka bobeli boo.

<sup>111</sup> O fuoe Palestina, Abrahama bo, kapa ke Israele. O fuoe ho rua lefatše la Palestina. Ba siile lefatše la khale tlase mono, 'ba rua Palestina, lefatše le kollang lebese le linotši. E, monghali.

<sup>112</sup> Ba kile ba siea eng? Ba siile letsatsi le chesang, tlasa motubi tlase Egepeta. Eaba ba ruang, ka ho siea mahlaseli a futhang ao a letsatsi tlase mono? Ba tsamaile ka hara Leseli la Topallo ea Mollo. Ho siea letsatsi le chesang leo tlase mono, ho tsamaea Leseling la Topallo ea Molimo ea Mollo. Kananyo e kakang! Ke rata kananyo eo. Lona ha le rate? [Phutheho e re, "Amen."—Mong.] Topallo ea Mollo. Ho tsamaea leseling la letsatsi la tlhaho, teng ba qhojoa tlasa batubi; ho tsoa mono le ho tsamaea Leseling la Molimo, tlasa matla a Moea o Halalelang, Topallo ea Mollo e neng e ba tataisetsa lefatšeng la pallo.

<sup>113</sup> Ho a tsoana le kajeno. Ke ho tsoa leseling la lefatše lena, lintho tsee e leng tsa lefatše, ho tsamaea Leseling la Molimo. Le u tataisetsa lefatšeng la pallo.

<sup>114</sup> Ba boetse ba siea lipitsa tsa khale tsa galiki tsa Egepeta, lipitsa tsa nama tlase Egepeta. Ba ruang mohla ba téläng lipitsa tseo tsa khale tsa nama ea khale? Eaba ba eja lijo tsa Lengeloi. Manna a theohileng leholimong, ho fapanyetsa eie ea galiki.

<sup>115</sup> Joale, haeba u eso je letho ntle le galiki, e re ke u bolelle taba, Molimo o hlohlile Leholimo ka Sejo sa Lengeloi, ho u fepa. Ke hantle.

<sup>116</sup> Sejo sa Lengeloi, ba fumana hoo ho fapanyetsa, ho fapanyetsa galiki ea khale ea Egepeta.

<sup>117</sup> Ba siea metsi a lukehileng a Egepeta. Eaba ba rua eng mono? Ho nosoa Lefikeng le teiloeng lefeelleng, la metsi a Molimo a hloekileng a bonaletsang. Ba siile metsi a lukehileng a Egepeta, metsi a lukehileng a hlanameng a bolumeli ba khale.

<sup>118</sup> Ka linako tse ling re tlamehile ho etsa hoo kajeno. Ho siea tumeloana eo ea khale le bolumeli, bo reng, "Matsatsi

a mehlolo a fetile. Mathaka ao a hlanya. Bao ke seholpha sa bahalaleli—batethehehi.” Siea ntho eo morao, u tšelete ka koano u noe Selibeng se tletseng ka... se montsoeng metsong ea Emmanuele, baetsalibe ba qoelang leqhubung leo ba lahla koli eohle ea sebe sa bona. E, monghali.

<sup>119</sup> Siea metsi ao a khale a seretse, a tsoakiloeng le pelaelo, le lipherekano, le likhang, le ho kolochna, le ntho eohle, le ho theoha bosiu ho ja moapeho oa sopho, le ho belisa khoho ea khale ho e rekisa ka lisente tse mashome a mahlano, sejana, ho lefa moreri. Athé, holane la boloka melao ea Molimo, le melao e halalelang ea Molimo, le ho tsamaea le Molimo, le tla lefa karolo ea lona ea leshome, moreri o tla itokela, holane le ka amohela tsela ea Molimo ho e etsa. Hantle. Metsi a khale a lukehileng; ho noa Lefikeng.

<sup>120</sup> Ba siea lingaka tse ikakasang tseo tsa Egepeta, tse reng, “Rōna re banna ba masejana lefatšeng kajeno.” Ba siea lingaka tse ikakasang, ho lula le Ngaka e Kholo. Amen. Nka rata ho bona ngaka e itšoarang joalokaha Ngaka e kholo e sebelitse kajeno. Batho bao ba hlotse lefeelleng lilemo tse mashome a mane, ’me ba tsoile ho se le a mong ea tšeremang har’ a bona. Ha se ke a ha fumanoa motho ea tšeremang hara bona, lilemo tse mashome a mane. Mohlang oo ho tsoile batho ba ka fetang limilione tse peli. Masea a hlahang bosiu ka bong a makae? Ba kulang ba bakae? ’Me ba ne ba... .

<sup>121</sup> Ke rata ho chakela Ngk. Moshe, ke nyarela khetsaneng ea hae, ho bona motsoako oo a ba neileng oona. Na ha le rate ho sheba seo? Ke kholoa lingaka tse ngata li ka rata ho sheba motsoako oo. Be, nka le bolella. Ke o balile. Le batla ke le bolelle na ke ofe? “Ke ’na Morena ea folisang maloetse a hao kaofela.” E le phetho seo a se bolokileng. E le phetho seo a se hlokileng, ka hobane ba tètse lingaka tse ikakasang, ho lula le Ngaka e Kholo. E, monghali.

<sup>122</sup> Ba tèla tlase mono, batho ba itse, “Matsatsi a mehlolo a ne a fete. Mehlolo ha e sa le eo, hape.” Ba tètse hoo, ho etsang? Eaba ba etsang ke hona? Ho lula hantle moo mehlolo e tla etsahala teng, letsatsi le letsatsi. Amen.

<sup>123</sup> Kajeno batho ba reng mohlolo ha o eo, phoso e teng kelellong ea bona. Ke hantle.

<sup>124</sup> Motho o kile a mpolella, ka mohla, ha thoe, “Ha ke tsotelle na u entseng. Ha ke tsotelle. Ha ke khone, hore u tšoere bopaki bo bo kakang,” ha thoe, “Ke mpa feela ke sa e lumele.”

<sup>125</sup> Ka re, “Ehlide lekhale. U ke ke ua e bona le ka mohla. U mpa u foufetse haholo ho e bona.” Ke hantle. Ka re, “Ha e a etsetsoa bomosalumele. E etselitsoe balumeli. Balumeli ba e bona.” Ke hantle.

<sup>126</sup> Mothaka o n'a re ho 'na, ka mohla o mong, a kopana le 'na seterateng, ha thoe, "Thuto ea hao e fosahetse."

Ka re, "Ke Bibe."

<sup>127</sup> A re, "U fosahetse." A re, "Ka hona, ke khahlano le uena." Ha thoe, ke hona, "Nkotle ka bofotu. Pauluse o kile a otla monna e mong ka bofotu." Ha thoe, "Nkotle ka bofotu."

<sup>128</sup> Ka re, "Ha ke—ke—ke khone ho etsa hoo. U se u foufetse. Yaa. U a . . . Ebe nka etsa joang seo ntatao, Liabolosi, a seng a se entse?" Ke hantle. "U se u foufetse." Monna ea ka rialong, o se—se a foufetse hona, ha a khone ho khetha letsatsi ho lefifi. Ha khone ho etsa phapang ea bobeli boo, Bophelo kapa lefu. Hoo ehlile ke hona ho foufala. E, monghali. E.

<sup>129</sup> Ngaka e kholo e ne e ahile le bona, 'me ba bone ho etsoa mehlolo. Ehlile.

<sup>130</sup> Barutuoa, ba kile ba tèlang? Ba ne ba tšoere matlooa, matlooa a hlapi. Ba tètse matlooa a bona a hlapi, ho tsamaea le Eèna, le ho bona lipontšo tsa Hae, le mehlolo, le matla a Hae, a Messia. Mang le mang ea sa tl'o tlohela ho tšoasa lihlapi letsatsi le le leng, ho latela hoo, phoso e teng. Ba kile ba tela matlooa a bona, a tletseng hlapi. Ba qala ba hula, ba tšoere ho feta mehla eohle. Eaba ba tèla nthoana ea hoo hohle, ho latela Eèna, kahobane ba Mo lumetse e ne e le Messia pelóng tsa bona. 'Me ba ne ba batlile ho Mo sala morao, ho bona haeba lipontšo li tla Mo latela joaloka Messia. 'Me ba kile ba e bona.

<sup>131</sup> Nka tèla ntho efe lefatšeng, ha ke tsotelle na ke efe, ho bona Jesu Kreste a Iponahatsa, haholo haeba e bonahatsoa bophelong ba ka, ho itseba ke tlohile lefung ho kena Bophelong, 'me ke Mo tseba e le Messia. Kea tseba, ka ho Mo nka Lentsoeng la Hae, O mpholositse bophelong ba sebe. 'Me kea tseba Moea o Halalelang o ahile ka ho 'na. Ke bona lipontšo tsa Hae, hohle, lia itšupa. Kea Mo tseba esale eèna maobane, kajeno, le kamehla. Ho tèla sohle, ke ikemiselitse ho tèla ntho efe le efe.

<sup>132</sup> Nkile ka ba setho sa mokhatlo o khabane, kereke e khabane, e 'ngoe ea tse fetisang ka botle naheng. Empa ba ne ba re, "Billy, u tlil'o lahleheloa ke kelello ea hao u be u fetohé mothethehi—mohalaleli."

<sup>133</sup> Hantle mono, ka re, "Le mpe le nkamohe setlankana sa botho ba ka hona joale, hobane ke tlil'o latela Moea o Halalelang." Ke hantle. Ka sebele.

<sup>134</sup> 'Me u tlameha ho tèla sohle, ke hantle, ho Mo latela. Empa ea tlang ho tèla tsohle, 'me a Mo latela, Molimo o tla putsa ka mahlohonolo a khaphatsehang a menono—nono. Ha ho letho le ka bapisoang le hoo. Ho lokile.

<sup>135</sup> Joale, barutuoa ba tètse matlooa a bona, le matlooa a tletseng hlapi, mosebetsi oa bona. Ba tètse mosebetsi oa bona, ho

latela Morena Jesu, ho bona matla a Hae, ho bona pontšo. Banna bao e ne e le banna ba koetlisitsoeng. Ba tseba seo Messia a ne a tlamehihle ho se etsa. Ba ne ba balile, morao ka hara Bibele. Ba utloisisa seo Messia a ne a tlamehile ho se etsa. Ba tsebile nako ea ho etsa hoo e fihlile. Eareha ha bona Monna enoa a hlaha temeng, Eèna ea nyallaneng le papiso eo, eaba ba itokiselitse ho tèla tsohle, ho mamela seo A neng a tla se bua. Hobane, haeba e ne e le Messia, ho bona e ne e le Bophelo, kaha ba kile ba mengoa ho Mo latela. Ebile moo ba tèlang sohle.

<sup>136</sup> Le kajeno ho a tšoana, haeba *Sena* se nèpile, efèla ha Molaetsa oona oa kolobetso ea Moea o Halalelang matsatsing ana a qetelo, etsoe A ipoletse A tla re tšollela pula ea tšeola le ea hoetla. Efèla ha tsena tsohle li lokile, E lokeloa ke ho tèla sohle. Ho E sala morao.

<sup>137</sup> Jesu o itse, “Lipontšo tsena li tla tsamaea le ba lumelang. Ea lumelang ho ’Na, leha a shoele, o tla boela a phela. ’Me ea phelang ’me a lumela ho ’Na a ke ke a shoa. Ea lumelang ho ’Na, mesebetsi eo Ke e etsang o tla e etsa le eèna.” Ka sebele.

<sup>138</sup> “E—eang ka lefatše lohle, ho sebopuoa ka seng. Lipontšo tsena li tla tsamaea le ba lumelang. Ka Lebitso la Ka ba tla leleka batemona, ba bue ka lipuo tse ncha, ba tšoare linoha. Leha ba enoa lintho tse bolaeang, e ke ke ea ba ntša kotsi. Ha ba bea matsoho holima ba kulang, ba tla fola.” Ke seo A se buileng.

<sup>139</sup> “Joaloka Ntate ha a Nthomile, le ’Na ke le roma joalo.” Ntate ea romileng Mora, o ne a tsamaee le Mora, o ne a ahile ka ho Mora. Jesu ea romang motho, o tsamaea le eèna, ’me o ka ho eèna, ho phethahatsa le ho etsa eona mesebetsi eo. “Bonang, Ke na le lona kamehla, esita le ho isa bofelong ba lefatše. ’Me mesebetsi eo Ke e etsang le lona le tla e etsa.”

<sup>140</sup> Moena, efèla hoo ha ho sa fete litumeloana tsa khale le linyee tsa lefatše ka molemo, le ho iketsa setho sa sa ntho eseles mono e latolang Hoo hohle! Khele, ke nahana re tlamehile ho ba batho ba thabileng ka ho fetisa lefatšeng lohle, ho bona Molimo o phelang o re teetse hare tjena; ho tseba hobane re tètse tsohle, ho latela Eèna. Amen. Hoo ho ntlatsa borapeli hakakang. Ho tèla tsohle, ho latela Morena Jesu. Ho a tšoana le kajeno, u tlameha ho tèla tsohle. Kamoo ba entseng morao mono, u tlameha ho etsa hoo, hape.

<sup>141</sup> Joale, le bua ka motho ea tèlang ho hong, ha re shebeng taba, re shebeng Jesu, Jesu o kile a tèla sebakeng sa rôna. Jesu o ne a tèla sohle. A ena le lehae Leholidong. ’Me eaba O tèla lehae la Hae Leholidong, le ho tla lefatšeng, le hloho ea Hae e se na moo e ka sameloang teng. Ke hantle. O ne a theoletsoe tlase, ho fihlela A bile... e le mofutsana hona, A se na le moalo oo a robalang ho oona. O itse, “Liphokojo li na le mesima, le linonyana li na le sebaka... tsa sebaka, li na le lihlaha,

haele Mora motho ha ho moo a samelang hlooho ea Hae." Ua bona? Empa eaba O fuang ka hoo? A nyolleoa holimo hoo A tlamehang ho shebela leholimo tlase.

<sup>142</sup> O ttile lefatšeng, a rua lebitso le tlase ho fetisa le ka ruuoang lefatšeng. A rua lebitso le tlase, ho ikela lebitso le tlase, ho bitsoa Belsebule. Belsebule ke e...Mohla ba 'Monang a senola meeaa ka mokhoa oo, ba itse, "Ke senohe. Ke Belsebule, liabolosi." Ho noha mahlohonolo ke liabolosi. 'Me ba kile ba Mo bitsa liabolosi, ntho e tlase ho feta tsohle. O kile a inkela lebitso le tlase ho feta.

<sup>143</sup> O kile a theohela motseng o tlase. 'Me monna ea fetisang ka bootloana motseng a Mo shebela tlase; Sakea, hoo—hoo ke 'nene, mane Jeriko. Tlase koana, o entse hoo. Lebitso la Hae le le tlase ho feta oohle lefatšeng. O ttile lefatšeng e le "oa bonyatsi," ba Mo reile hoo, kaha ba khotsoe Lesea le tsoetsoe ka ntle ho lenyalo. O ne a tlamehe ho loantšana le hoo, le ho qaleng. Le ho reoa Belsebule, hoo ho tlase ho feta eng le eng e ka fihleloang. A tèla bolulo ba Hae ba leholimo, a tla a inkela hoo.

<sup>144</sup> Empa Molimo o Mo neile Lebitso le ka holim'a mabitso oohle a bitsoang Leholimong, har'a lebitso ka leng le bitsoang lefatšeng, ebile leloko lohle la Leholimo le la lefatše le bitsoa Morena Jesu. Alleluia! Ke eona. O ile a tèla; O ile a putsoa. Ehlide, O entse hoo. Ke hantle.

<sup>145</sup> O ttile lefatšeng, Mohloli oa maholimo le lefatše, 'me A hloka seo a se jang. Satane a Mo leka, a ntse a itimile lijo sebakeng sa rōna, empa A fuoa lijo tseo ba bang ba sa kang ba li tseba.

Ka tsatsi le leng O kile a rialo. "Ke na le lijo."

Ha thoe, "Hobane U sa tle, ho ja?"

<sup>146</sup> A re, "Ke na le Lijo tseo le sa li tsebeng." Ke hantle. A e na le Lijo tseo ba sa li tsebeng.

<sup>147</sup> Mona lefatšeng, O hlokile setšabelo, ba itsalo, a se na sebaka, a se na ntlu, A se na le letho. Empa lea tseba ke'ng? O fetohile Setšabelo sa e mong le e mong oa rōna. Molimo o Mo fetotse Setšabelo, sa moloko oohle oa bana ba batho. O hlokile setšabelo sa Hae, empa Ke Setšabelo sa rōna.

<sup>148</sup> Esale ba buoa ka litšabelo tsa seoaholimo. Oh, khili! Re na le se seng. Ke hantle. Litšabelo tsa seoaholimo, ho kena mokoting o fatše. 'Me ke boleletsoe, "Libomo tseo li tla otla li phatlolé selomo fatše, sa botebo ba maoto a lekholo le mashome a mahlano, se etsang sekoere maele sa lekholo la limaele le ho hong." Khele, se ka u pshatla lesapo ka leng, haeba u lutse botebong ba halofo ea maele mobung. Ehlide, se ne se tla etsa hoo, hohle. Empa re na le Setšabelo. Kreste ke Setšabelo sa rōna. Amen.

<sup>149</sup> Mokana ke boletse bosiu bo bong, ba khonne, esale Rashia e iphafa ka boiphafu ba eona ba botonana, boemo, “Ke rōna ba suntseng motho oa pele, sebakeng.”

<sup>150</sup> Ke fapanu le hoo. Re bile le e Mong sebakeng lilemo tse likete tse peli. Amen. Hantle. E, monghali. 'Muelli, e, monghali, ea kenang Leholimong, le ho boela a khutla, ka sekotoana sa motsotsaana. Ehlide. Re na le Monna sebakeng. Bona ha ba na letho. E, monghali. Hantle. Ho lokile. Re Mo fumana a sa ka a fumana . . . O ne a tlamehe ho fetohela rōna bohole Setšabelo.

<sup>151</sup> O tētse boMora ba hae, lipakeng tsa Hae le Ntate, ho etsoa sebe ka baka la rōna. Ana le tsebile seo? “Ea sa kang a tseba sebe; o fetohile sebe ka baka la rōna. Libe tsa rōna tsa jarisoa Eèna.” O ne a tèle boMora, ho fetoha sebe, joale A ka fetola baetsalibe bara. Amen. Ke eona karolo e monate eo, ho nka baetsalibe ho ba fetla bara. Mohla A ne a tèle boMora, ho fetoha sebe, joale O nka baetsalibe o ba fetola bara. Amen. Monyetla o mokakang! E, monghali.

<sup>152</sup> Molimo ha o ke o rekisoa ka theko e tlase. Che, monghali. U ke ke ua etsa sena, hobane Molimo o hlokomela seo. Mora oa Oona o ne a beoe sehlabelo sa sebe, hore joale A tle a reke, ho nka baetsalibe le ho ba etsa bara ba Molimo. Ke ntho e ntle hakakang eo. Yaa!

<sup>153</sup> Joale, e, monghali, O—O tētse matla a Hae. A fetoha mofokoli, E tle e be matla a rōna. Ke Matla a rōna a tltseng bokhoni—bohole. Ha re hloke matla a mang ntle le matla a Morena Jesu. “Ke Matla a ka letsats le letsatsi. Ka ntle ho Eèna nka hloleha,” seroki se itsalo. Ho babatseha hakakang!

<sup>154</sup> Seo u se tēlang; seo u se ruang, ka baka la seo u se tētseng! Khele! Tèla lefatše. Tèla menahano ea hao ka sebele. Tèla lipelaelo tsa hao. Tèla lipherekano tsa hao. E tèle, ‘me u amohele Eèna. Lumela Eèna.

<sup>155</sup> Ho re, “Joale, na ho joalo? Na matsatsi a mehlolo a fetile?” Tèla mohopolo oa mofuta oo. E lumele.

<sup>156</sup> Motho o itse, “Na Jesu ehlide ke Mofolisi, kapa e mpa e le feela e—e khahlakhahla ea kelello eo batho bana ba e tšoereng?” Tèla mohopolo oo feela, hang ka nako.

<sup>157</sup> “Joale, u tla tseba ka’ng haeba e tla nepahala kapa che?” Ke tšepeiso. U tseba joalo.

<sup>158</sup> U re, “Oh, ke lumela Moea o Halalelang o ne o etselitsoe bao ba morao koana, khale koana, bakeng sa barutuo ba le bang.” Oh, ho ke ke ha ba joalo. Ka hona, haeba ho le joalo, Bibele ea itoantša.

<sup>159</sup> Petrose o boletse, ka Letsatsi la Pentekosta, “Bakang, le kolobetsoe e mong le e mong ka Lebitso la Jesu Kreste tšoarelong ea libe, le tla amohela neo ea Moea o Halalelang. Hobane pallo eo e etselitsoe lona, le bana ba lona, le ba leng

hole kaofela, bao Morena Molimo oa rōna a tlang ho ba bitsa.” Ka hona haeba e le pallo ea Molimo, e reng re ka khona, bao Molimo a ba biletsoang ho Moea o Halalelang, u na le tokelo ea ho tla. Ako tèle menahano ea hao ka Eona, le ho nka Lentsoe la Molimo le lekanyelitsoeng eona.

<sup>160</sup> U re, “Na ntho e kang eo e teng, e reng batho ba ka bua ka lipuo, kapa e mpa e le bothoto feela, kapa ho holoketsa hoo ba ho entseng?” Ako tèle mohopolo oa hao feela.

<sup>161</sup> Jesu o buile sena, “Lipontšo tse tla tsamaea le balumeli ke tsona tsena. Ba tla bua lipuo tse ncha.” Bibele e itsalo. E, monghali.

<sup>162</sup> “Moena, na ebe lipontšo tsee tseo ke li bonang ka hara—ka hara likopano, na e ka be e le Molimo?” Ruri, e ka ba eona. “Be, ke bone batho ba phelang bophelo ba mofuta ofe, ’me ba tlohilie ba rapella bakuli, ’me ba fola. Ke...”

<sup>163</sup> Jesu o boletse, “Ha ho motho ea ka etsang mohlolo ka Lebitso la Ka, ea ka buang habobebe ka ’Na.” Ke hantle.

<sup>164</sup> Efèla ha motho a fosahetse, a nka neo ea Molimo ho etsa phoso, Molimo o tla mo sebetsa. Empa ke Molimo, ka ho tšoana. Ehlide, ke eona. Kahobane feela e le moikaketsi, e tlameha ho u phatsimisa hantle. U ke ke ua fumana e... Mokhoa oa ho fumana ntho ea sebele...E—e dolara ea moshaqane, e tlameha ho qopitsoa ho ea makhonthe.

<sup>165</sup> ’Me mang le mang o re, “Ha ke tsamaee kereke. Ha ke batle ho ea kerekeng. Baikaketsi ba bangata haholo.” Khele, u monyenyané ho ba feta. U ntse u leka ho ipata ka morao ho bona. Haeba u khona ho ipata ka morao ho bona, u monyenyané ho bona. Ke hantle.

<sup>166</sup> Ke balile seratsoana sa lehlaseli tsatsi le leng, moo monna oa leqheku...Eèna e le setholo, le semumu, a bile a foufetse, ’me Sontaha ka seng a tsamaea sekolo sa Sontaha. Eaba ba mo botsa, ka mongolo oa lifofu, ha thoe, “Hobaneng u tsamaea kereke? Ha u utloe seo moreri a se buileng. Ha u utloe lifela ho hang. Hobaneng u tsamaea kereke?”

<sup>167</sup> Eaba o re, “Ke batla mang le mang a tsebe lehlakore leo ke le emelang.” A mpa a batla ho tsebisa Liabolosi le mang le mang lehlakore leo a le emelang. Ke nahana e le ntle. E, monghali.

<sup>168</sup> Jesu o boetse a etsa’ng? O neelane a ba a tèla Bophelo ba Hae ka sebele. O neelane ka Bophelo ba Hae, ho pholosa ba hao le ba ka. Kahobane A—kahobane A neelane ka bophelo ba Hae...O ne a sa tlameha ho bo bea fatše. O e entse ka boikhethelo. O ne a sa tlameha ho e etsa, empa O e entse ka boikhethelo, kaha A ne a ka u pholosa. ’Me joale ke Eèna a le mong ea ka u pholosang. Ha ho letho le ka u pholosang.

<sup>169</sup> Ke tseba bolumeli bo reng kereke ea bona e a u pholosa. “U pholosoa ke kereke.”

<sup>170</sup> U photosoa ke Jesu Kreste kapa u lahlehile. E, monghali. Ha ho letho leo u ka le khonang, u ke ke ua etsa letho, ako bakele sebe sa hao feela. Jesu Kreste ke Mopholosi. E, monghali. O neelane, O neelane ka bophelo ba Hae sebakeng sa hao.

<sup>171</sup> Joale, ke nahana hoo, kajeno . . . E re re sa koala, re ka bua sena. Hore, ke tšoanelo ea rōna, ke hona, ho neelane ka bophelo ba rōna le borōna bohole, le ho tēla sohole sa lefatše, hohle ho hlokang borapeli, ho se lumele hohle ha rōna, le hohle, ho latela Eèna joaloka barutuo bao. Na ha le rate ho etsa hoo? [Phutheho e re, “Amen.”—Mong.] Ho Mo latela, ho etsang? Ho bona lipontšo tsa Hae tse kholo tsa ho Khutla ha Hae.

<sup>172</sup> Joale, hopola, Bibele e a tšepisa, ho thoe, matsatsing ana a ho qetela, feela mohla nako e khahlelang, Leseli le leng la Bokreste le tla chaba. “Pula ea tšeola le pula ea hoetla li tla theoha,” ‘moho. Moporofeta o boletse, “Leseli le tla chaba nakong ea mantsiboea. E tla ba letsatsi le ke keng la bitsoa motšehare kapa bosiu.”

<sup>173</sup> Ke letsatsi la mofuta mong leo? Le batla le sithabetse pula, mouoane, letsatsi le soto. Letsatsi le mpa le chabile, ehlide, letsatsi le chabile ka holima meholi koana le maru. ’Me hara ntho eo, moholi oo oohle, koana leseli le sa ntse le chabile, le tle le khone ho tsamaea, ho bona moo u eang teng.

<sup>174</sup> Re fumane hoo lilemong le lilemong tsena, ka lilemo tse likete tse peli. Ua bona? Esale re tsamaea ka tumelo, ’me ra ’na ra nahana, “Be, hoo ho itoketse. Uh—huh. Rea lumela, ’me re ngolisa kerekeng, le ho ngolisa lebitso la rōna bukeng. ’Me hoo ho itoketse. Rea lumela. Ha re bone lintho tse kang tseo A li entseng morao matsatsing ao, motšeо koo.” Ba itse, “Hoo hohle ho fetile. Ke morao koana.” ’Me esale ho le joalo ka—ka makholo le makholo a lilemo, letsatsi le soto feela.

Empa O itse, “Ka nako ea mantsiboea, Leseli le tla chaba.”

<sup>175</sup> Joale, lona letsatsi le chabang Bochabela ke lona letsatsi le likelang Bophirimela. Eèna Jesu ea neng a . . . ho tšollela Moea oa Hae ka Bochabela, holima bona batho bao, ke eèna Jesu ea leng matsatsing ana a ho qetela, ho tšollela Moea oa Hae. Le holima batho ba Bophirimela. O e tšepisitse.

<sup>176</sup> O tšepisitse. O boletse, “Joaloka matsatsing a Lota, ho tla ba joalo ho tleng ha Mora motho.”

<sup>177</sup> Kamoo Molimo o kileng oa Iponahatsa ka ’mele oa motho, oa lula mono oa ja le Abrahama, mokokotlo oa Oona o furaletse tente, le ho bolella Sara seo a se hopotseng, ka hara tente. Oa bolella Abrahama lebitso la hae, le lebitso la Sara, le kamoo O tleng ho ba etela. ’Me Sara a se ke a e lumela, a tšeha, ka tenteng. ’Me Lengeloi la re, “Sara o tšehele ke’ng?” Ka hara tente, ka sekotlong sa Monna.

<sup>178</sup> Jesu o boletse, “Joaloka letsatsing leo, ho tla ba joalo ho tleng ha Mora motho.”

<sup>179</sup> Esale ke bolela khafetsa, ke itsalo bosiu bo fetileng, ke batla ho e qotsa hape. Lihlopha tsa batho li tharo kamehla, ka linako tsohle, joaloka Kama, Sema, le batho ba Jafeta, bara ba bararo ba Nooe. Ho theoha joalo, ho na le—ho na le lihlopha tse tharo tsa batho. Joale re ba hlropholla tjena: mosalamele, moipehi—tumelo, le molumeli. Joale e fihlela sehlohlolo seo. Le mono e entse hoo. Jesu o boletse, “Joaloka matsatsing Sodoma, le lena le tla ba joalo.”

<sup>180</sup> Abrahama, ea neng a tètse tsohle, ho latela, joale ke ena, hantle ho theoha. Esale a bolokile tšepiso eo lilemo le lilemo, lilemo tse mashome a mabeli a metso e mehlano. Ke enoa, o lilelo tse lekholo joale. ’Me o holimo mona masimong. Mohlape oa hae o ntse o eketsa ho ota, ’me metsi ha a eo. ’Me, Lota, o phela ka boiketlo tlase mane ka tsohle tseo a li batlileng. Le Sara e ne e le enoa, e kile ea eba mosali ea fetisang ka botle naheng, ’me, ke enoa joale, o batla a haelloa.

<sup>181</sup> ’Me e ka ba Mof. Lota o ne a betlile moriri oa hae moloho o mocha ona oa metsi, u a tseba, le nyee ena eohle. A phela boiketlong tlase mono. E le mohatsa ramotse, e le setho sa kereke e leng kereke e kholo. E, monghali. ’Me ntle le pelaelo a theile lisosaiti tsa hae tsohle. A sa batle ho se phela, ho se tlohela, hoo a bileng a ’na a hetla. Eaba o fetoha tšiea ea letsoai kaha a ne a ratile lefatše ho feta ho rata ho utloa puo ea Lengeloi leo.

<sup>182</sup> Joale elelloang lihlopha tse tharo. Bomosalumele, ke Basodoma, ba tsamaea tsela e sa tlalang, litho tse fōfō tsa kereke, e ne e le Lota. Empa mokhethoa, kereke e bitsitsoeng e ne e le Abrahama le sehlopha sa hae. Mohla, Mangeloi ana, ebe A tlide kae? Ho Abrahama le sehlopha sa hae. Hantle. A ile a theoha, a mabeli a theohetse tlase mono, joaloka baboleli ba mehla ena.

<sup>183</sup> Re fumana baboleli ba baholo ba—ba etelang kereke ea bolumeli kajeno. E mong oa banna ba baholo naheng, eo re mo tsebang, ke Billy Graham. ’Me eèna o hlile o phatlolela batho bao Evangelie ka ntle mono, o ntse a ba bitsa, “Tsoang Sodoma.”

<sup>184</sup> Ha rea tlameha ho hooeletsa “Tsoang Sodoma,” ho Kereke ena. E tlamehile e be e se e tsoile, khale. Haeba e bitsitsoe ke Moea o Halalelang, e se e ne e tlohele Sodoma, khale nako e fetileng. Ke hantle. E tètse Sodom. E phela ka ntle mona, ka Boeona, ka nèpo, e ikhethile. Lona lentsoe kereke le bolela “ea bitsitsoeng, ea ikhethileng.” ’Me haeba o ikhethile, ntho ea hao...

<sup>185</sup> “Tsoang hara bona. Le se ame lisila tsa bona.” Haeba u eso etse joalo, u tlase Sodoma; u setho sa kereke, se fōfō. Ka hona u tlameha ho ikhetha, le ho suthela hole le lintho tsa lefatše, le ho tsoa, le ho phela bohloeki le khalalelo, ho tsamaea ka melao ea Molimo.

<sup>186</sup> Hopolang, Mangeloi a mabeli ho ano a theohetse mono. Ha a etsa mehlolo e mengata. A entse mohlolo o le mong feela, ke ho otla batho ka bofoufou mohlola ba tiliteng ho bona.

<sup>187</sup> Be, theroy ea Lentsoe e etsa hona hoo, e otla batho ka bofoufou. 'Me baboleli ba baholo bana ba kajeno, bao re ba tsebang, bongata ba bona bo etela Phoenix mona. 'Me—'me baboleli ba baholo ba tsoang ho...ba tlohileng ba kena tšimong, ha ba etse mehlolo le lintho tseo, empa ba hlile ba foufatsa bomosalumele bao, Basodoma bao, ka theroy ea Lentsoe, ho re, "Jesu Kreste ke Mora Molimo."

<sup>188</sup> Empa, hape, Kereke ea moea ke ena; e seng kereke ea tlhaho, leha e le Mosodoma. Empa Kereke ea moea, e lumelang ho Molimo, e etetsoeng ke Molimo, joaloka Abrahama, ho theoha hantle. Abrahama ke papiso e phethehileng ea Peō ea Abrahama e mo latelang, ka hara Kereke, "Batho ba tsoang ho Balichaba, ka lebaka la Lebitso la Hae," Peō ea borena, kamoo ke rerileng ka Sontaha. Ua bona? Joale, Kereke ena, E bitselitsoe ka ntle, e khethiloe, e tètse sohle sa lefatše, ho tsoela ka ntle, ho tsamaea le Moea o Halalelang, kamoo le eèna Abrahama a entseng.

<sup>189</sup> Re bone lintho tsa mefuta eohle, kamoo le eèna Abrahama a entseng, a tiliteng kateng. Empa o bone pontšo efe ea ho qetela pele leeto la tsela le fellay? Pontšo ea ho qetela pele mora ea tsepisitsoeng a fihla temeng ebole ea eng? Abrahama o ne a lebeletse mora. Na ho joalo? [Phutheho e re, "Amen."—Mong.] Na re Peō ea Abrahama? ["Amen."] E tla ba re lebeletse Mora, e leng Mora oa tsepiso, Mora oa Molimo.

<sup>190</sup> 'Me Abrahama o bone mesebetsi e mohlolo ea Molimo mohlola A mo bitsang, ka hara Leseli le lenyenyan leo mohlang oo, le sehlabelo, le ho mo tiisetza selekane. 'Me O kopane le eèna khafetsa ka litsela tse fapaneng. Empa pontšo ea ho qetela A e bontšitseng Abrahama, ke mohlola A fihlang, a bonahetsenameng, le ho lula A furaletse tente, le ho bolella Sara.

<sup>191</sup> Ntle le pelaelo Abrahama o lumetse hobane eo e ne e le Molimo. Batho ba bang ha ba e lumele ka tsela eo. Empa, hoo, Bibele e boletse e ne e le Molimo. Abrahama o itse E ne e le eona. O Mo bitsitse, "Elohim." Elohim ke Mohloli e moholo oa maholimo le lefatše.

<sup>192</sup> Joale, O ile a Iketsa, nama, e le pontšo, eo ea matsatsi a ho qetela. Na le bona Masodoma, mosalumele? Na le bona setho sa kereke? Joale le shebe Mokhethoa, ea bitsitsoeng. 'Me ho Mokhethoa enoa, O ntse a Iponahatsa ka matla a Moea o Halalelang, ka nama ea motho. Amen. Na ha le bone hobane eo ke Messia? Molimo, Kreste, ea hlalositseng ka hara Kereke ea Hae; Kereke e hlahisang Bophelo bo tšoanang, e phela bophelo bo tšoanang, e etsa lipontšo tse tšoanang. "Ea lumelang ho 'Na, mesebetsi eo Ke e etsang le eèna o tla e etsa."

<sup>193</sup> Efèla ha moea oa—oa senokoane o ahile ka ho 'na, ke tla jara lithunya. Efèla ha moea oa setaki o ahile ka ho 'na, nka taka botaki ba setaki, nka khona joalo. Efèla ha moea oa setei sa makolo o le holima ka, nka u bolella bothata ba koloi ea hao. Ua bona?

<sup>194</sup> 'Me efèla ha Moea oa Jesu Kreste o le ka ho 'na, ke tla etsa mesebetsi ea Kreste, hobane Bophelo ba Kreste bo ka ho uena. Ua bona? Ho bonahatsoa ka ho Mang? Ho bonahatsa Mang? Eèna ke... Ho tèla boMora ba Hae, a fetoha sebe, a ipelesa libe tsa röna, A tle a nke baetsalibe a ba fetole bara. O fetohile 'na, hore 'na ke fetoha Eèna. O fetohile moetsalibe, hore 'na ke tle ke fetoha mora oa Molimo. Eèna... Oh, e—e a hlolla, seo A se entseng. Ua bona? O nkile malulo a hao, uena u tle u nke malulo a Hae. "Lona le majalefa 'moho le Eèna; 'Musong." O fetoha moetsalibe, joaloka uena, libe tsa hao li behiloe holima Hae; hore A tle a u nke 'me a u fetole moahi—'moho oa Leholimo, le ho u lulisa le Eèna 'Musong oa Molimo. Ke moo he: ho beha Moea oa Hae ka ho uena. 'Me haeba Moea oa Hae o ahile ka ho uena, le uena u tla etsa mesebetsi eo A e entseng.

<sup>195</sup> Joale, shebang seo A se entseng mohla A ne a le holima lefatše mona. O kile a Ipontšahatsa joang?

<sup>196</sup> U ke ke ua liila hohle, ua likalika hohle, 'me ua etela libaka tsa phulu, 'me u tsamaela hole le kereke, 'me Laboraro bosiu u itulela lapeng, ho shebella papali e itseng e litšila ea thelebishene, kapa ntho e kang eo, le ho tèla kereke ea hao, le hoo hohle, 'me u lebelle ho bona Kreste le ka mohla. U tlameha ho tèla lintho tseo, ho latela Moea o Halalelang.

<sup>197</sup> E re A Ipontšahatse joaloka Messia, kamoo balateli bao ba pele le bona ba entseng. Ba kile ba Mo latela, ho bona haeba E ne e le Messia. Le nahana ho etsahetseng mohla Andrease a qetileng bosiu bohole le Eèna bositung boo, eèna le Filipi? Hoseng ho latelang, Filipi a nka tsela ese, le Andrease ese.

<sup>198</sup> Ebile Andrease o ea batlana le moena oa hae. 'Me hang hoba a kopane le Simone, o itse, "Tloo, u bone. Re fumane Messia eo." O Mo tsebile E ne e le Messia. Hobaneng? O tsebile seo Messia a tlang ho ba sona. O tsebile, ka Lengolo, seo Messia a tlang ho ba sona.

<sup>199</sup> Joale, ehlile, Bajuda, matsatsing ao, ba ne ba e lekantse kahohle, likereke tseo tse kholo. "Oh, Messia mohla a fihlang, terompeta e tla butšoeloa lipakapakeng, 'me Molimo o tla lumisa ho hong, a kolumetse mehohoma ea Leholimo. 'Me tumeliso ea Lengeloi e tla phatloha holima lefatše. 'Me ke moo Messia a tlang ho hlah, a kaletse a lepella ka mehohoma eo ka tsela eo, ka Mangeloi le ka lihlopha tsa 'mino, le ka lintho tse kang tseo, ho theohela hantle tempeleng *ena*, ho kena ho eona. E tla be e le Messia. O tla tsoara lere, 'me a buse lefatše."

<sup>200</sup> Shebang ho fihla ha Hae ho ne ho fapane hakae, empa O tlide ho latela Lengolo. “A kaletse petsana ea mulete, o tlide, a kaletse a kena Jerusalema, a ikokobelitse a le mosa.” Ke hantle. Ua bona?

<sup>201</sup> Hoo ho bile ha khohlopa moporofeta, Johanne. O ne a rerile ka Messia ea tšoereng lioloso letsohong la Hae, ea tlang ho fiela seotlo sa Hae ruri; ‘me mohla A ne a fihla, keha a ikokobelitse a le mosa. Empa Johanne a tseba hobane eo e ne e le Messia, kahobane a bone Leseli holima Hae. ‘Me o tsebile hoo. O itse, “Ea mpoleletseng lefeelleng, ‘E—ea, u kolobetse ka metsi,’ ha thoe, ‘Eo u tla bona Moea o theohela holima Hae ‘me o lula, Ke Eèna ea kolobetsang ka Moea o Halalelang le ka mollo.’” Ha ho mang ea o boneng. Johanne o e bone. Tšepiso e ne e etselitsoe Johanne.

Ha ho mang ea boneng naleli e latetsoeng ke banna ba bohlale.

<sup>202</sup> Le bosiung bona ho a tšoana. U ka itulela mona, u foufetse habeli, ‘me u sa bone matla a Molimo. U ke ke ua e utloisia hofihlela Molimo a u buletse... “Bohle bao Ntate a ‘Neileng bona ba tla tla ho ’Na, ‘me ha ho ea ka tlang a sa huloa ke Ntate oa Ka.” Ke phetho. Ho lutse joalo.

<sup>203</sup> Joale re ba fihlela ba ile ba tèla tshole, ba Mo latela ba bona hobane E ne e le Messia. Andreatse a tloha a ea bolella Petrose, ho re, “U tseba seo ntate oa rōna a re boleletseng sona?” Taba e kang ena, mohlomong. “Rea tseba mohla Messia a fihlang. Moshe o re laile a re ‘Morena Molimo oa rōna o tla re hlahisetsa Moporofeta’ ea joaleka eèna. ‘Me re tseba hoo, re se re rutiloe hoo, ‘E mong hara lona, e leng motho oa moea kapa moporofeta, ekare ha a bolela taba e hlhang, le mo utloe. Ekare ha e sa hlahe, le se ke la mo utloa.’ ‘Me rea tseba Messia e tla ba hoo... e seng moporofeta feela. E tla be e le Molimo—Moporofeta. Ka baka leo Monna enoa ke Thaka leo.”

“Andreatse, u tseba joang?”

“Tloo feela, u bone.”

<sup>204</sup> Eaba o fihla mono. ‘Me hang hoba a fihle ka pela Jesu, Jesu a re, “Lebitso la hao u Simone, ‘me u mora Jonase.” A tseba, hona moo, hore eo e ne e le Mora Molimo.

<sup>205</sup> Filipi ke enoa a fihla, le Nathanaele. Hang ha Nathanaele a Mo atamela, o tsebile...

<sup>206</sup> Koana, kea kholoa, puisanong ea bona e kholo, ha ba ntse ba buisana ka eona, ba ntse ba etla. Le kamoo A boleletseng Petrose lintho tsena, a ba a mo rea lebitso le leng, le ho ‘molella na e ne e le mang, le ntate oa hae, le tse joalo, mabapi le eona. “Ua tseba Messia e ka khona e be moporofeta.”

<sup>207</sup> Be, ke enoa a nyoloha, a fihla ka pela Jesu. ‘Me Jesu a re, “Bonang Moiseraele oa sebele eo ho seng mano ho eèna.”

A re, “Rabbi, U ntsebella kae?”

<sup>208</sup> A re, “Le pele Filipi a u bitsa, u sa le tlasa sefate, Ke u bone.”

<sup>209</sup> A re, “Rabbi, U Mora Molimo. U Morena oa Iseraele.” Eaba ke phetho, ho eèna.

<sup>210</sup> Mothoana, mosajana oa khale, ea litšila, ea silafetseng, a phela le banna ba tšeletseng. A kile a nyaloa ha hlano, le eo a phelang le eèna e se oa hae. O kile a tsoela selibeng tsatsi le leng ho kha metsana. Eeare a sa theola pompo, kapa nkho ka khole, tlase, ho kha metsi, eitseha a sa qala, a bona Monna oa lilemo tsa bohareng a lutse ka ntle mono, Mojuda. Ha thoe, “Mosali, ako Ntlisetse metsi.”

<sup>211</sup> A re, “Khethollo e teng hara röna. Ha ho—ho . . . meetlo e le teng ha e U lumelle, uena u leng Mojuda, ho kopa ’na, mosali oa Mosamaria, tse joalo. Ha re sebelisane.”

<sup>212</sup> A re, “Empa holane u tsebile Ea buisanang le uena, u ka be u kopile seno ho ’Na. U ne u tla kopa metsi ho ’Na.” Bao feela . . . Ba tsoela pele, ba buisana, nakoana. E leha A etsang? O ne a leka ho fumana bothata ba hae.

Joale, “Jesu e ne e ka khona a fete le ka Samaria.”

<sup>213</sup> Hopolang, O kile a Ipontšahatsa Mojude le Molichaba . . . Eo ke Kama, batho ba Sema. Ua bona? Batho ba Jafeta ba ile ba siuoa morao. Röna maAnglo—Saxon, re ne re le bahetene, re khumamela lisèto litšiung tseo. Hopolang. Hobaneng A sa ka a Ipontšahatsa, Jesu, mohla A ne a le holima lefatše, ho Balichaba, ka pontšo eona eo, ho ba bontša? Hobane Balichaba ba ne ba sa lebella Messia.

<sup>214</sup> Bajuda ba ne ba lebeletse Messia, le Basamaria ba ne ba lebeletse Messia.

<sup>215</sup> ’Me O Ipontšitse e le Messia, ka ho bolella Petrose, eèna eo A mo fileng linotlolo tsa ’Muso. Le ho Nathanaele. Le ho sefou Bartimea, mohla tumelo ea hae e ne e Mo emisa. Le mosali ea nang le phallo ea mali. Le joalo, ho Bajuda.

<sup>216</sup> Empa joale O ka pel’ a Basamaria, ’me O tla ho Basamaria, ho Itsebisa e le Messia oa makhonthe.

<sup>217</sup> Joale, e se e le makholo a lilemo, Bajuda le Basamaria ba lumetse hore Messia o tla fihla. Ka baka leo, haeba Messia a ne a le holima lefatše, ke tšoanelo ea Messia ho Ipontša.

<sup>218</sup> Shebang leqheku Simeone ka tempeleng, ea tšoereng bopaki boo, ha thoe, “Nke ke ka bona lefu pele ke bona Kreste oa Morena.” ’Me ka oona motsotso oo Maria a keneng le Lesea, Moea o Halalelang o buisane le Simeone. A tsamaela hantle moo A neng a eme teng, ka tsela eo, a phahamisa matsoho a hae, le ho re, “Lesa mohlanka oa Hao a ikele ka khotsa ho ea ka Mantsoe a Hao, hobane mahlo a ka a bona Poloko ea

Hao.” Simeone ha a phela ho lekaneng ho Mo bona a etsahatsa mesebetsi ea Hae ea boMessia, empa a ba rekoto e reng E ne e le eèna.

<sup>219</sup> Empa O Itsebisitse batho, e le Messia, e le Molimo—Moporofeta eo. Mosali eo, mohla A ne a buisana le eèna, ha thoe, “E—ea, lata monna oa hao le tle koano.”

O itse, “Ha ke na monna.”

<sup>220</sup> Ha thoe, “U boletse teng. U bile le ba bahlano, le eo u lulang le eèna joale ha se monna oa hao.”

<sup>221</sup> O itse, “Monghali, kea lemoha hobane U moporofeta. Rea tseba, Messia mohla a tlang, O tla re bolella lintho tsena. Ena e tla ba pontšo ea Messia mohla A fihlang. Ke Eèna ea tlang ho re bolella lintho tsena.”

’Me Jesu a re, “Ke ’Na ea ntseng a buisana le uena.”

<sup>222</sup> Eaba o siea nkho ea metsi a matha a kena motseng, a bolella banna ba motse, “Tloong, le bone Monna Ea mpoleletseng seo ke se entseng. Ana ha se eèna Messia? Ana ha se eona pontšo eo Messia a neng a tla re bontša eona?”

<sup>223</sup> Ha A eso e etse khetlo le leng, pela mang feela oa bona, empa ho boletsoe banna ba motse oo ba lumetse ho Eèna ka bopaki ba mosali eo bo reng E ne e le Messia. Amen.

<sup>224</sup> Joale ke nako ea Molichaba. Re se re qetile lilemo tse likete tse peli tsa likhohlano, le meepa—le—metheo, mekhatalo, kantle—le—kahare, le likhang le likolokochano, le phehisano le ntoa, le ntho eohle, baithuti ba bolumeli le likoleshe tsa thupello, le eng hape.

<sup>225</sup> Joale, efèla haeba A lumeletse Basamaria bao le Bajuda ho theoha, bona ba neng ba tètse melimo ea lefatše, ho sebeletsa Molimo, ’me ba shebeletse Messia ea tlang; ’me Messia o ne a Itsebise Bajuda ka tsela eo, letsatsing leo. ’Me A ke ke a tlola litaelo tsa Hae. Ha se Ntate ea etsetsang e mong tjena, le e mong ntho ese, ntho e fapaneng. Esale Jesu ea tšoanang. Hantle.

<sup>226</sup> Joale, mona, re se re qetile lilemo tse likete tse peli. Moea o Halalelang o tšolohetse holima rōna. Re buile ka lipuo, le ho bona lipontšo le meeka, le tse joalo. Joale, pontšo ea ho qetela eo Abrahama a e boneng, pele mora oa pallo a khutla, e ne e Molimo o Ipontšitseng ka ’mele o khonneng ho ja, ka ho lepa le bontša eona pontšo eo Jesu a e bontšitseng mohla A ne a le mona, ho ba Messia. Joale, Jesu o porofetile a re ho tla ba joalo. ’Me, metsoalle, joale ke hora.

<sup>227</sup> Bajuda bao ba emeng mono, eitseha ba bona Jesu a rialo ho monna eo, ba itse... Keha ba tlamehile ho araba liphutheho tsa bona. Bao, ba e tsebile e entsoe, ka baka leo ba sitiloe ho etsa letho ka eona. Keha ba tlamehile ho arabela phutheho ea

bona, ka baka leo ba itse, “Monna enoa ke Belsebule. O . . .” Ba e hopotse ka pelōng ea bona. “Monna enoa ke Belsebule, ua bona, hobane Ke senohe—ramahlohonolo, ntho e kang e—e mobalolli oa kelello, kapa ho hong. Ke Belsebule.”

<sup>228</sup> Jesu a lemoha mehopolo ea bona. Eaba O retolohela ho bona, ’me A re, “Le ka rialo khahlano le ’Na, Mora motho, Ke tla le tšoarela hona. Empa, ka mantsoe a mang, ka tsatsi le leng Moea o Halalelang o tla fihla, ho etsa hona hoo. ’Me ho bua khahlano le Eona, e ke ke ea tšoareloa lefatšeng lena leha e le lefatšeng le tlang ho tla.”

<sup>229</sup> Oh, moena, ke thabetse ho rua lesèho la pentekosta bosius bona. Amen. Ntle le pelaelo ka mona, baena, le lutse mona le tsoa church of God, Foursquare, Assemblies of God, le tse ling tsohle tse fapaneng. Hoo ho a babatseha. Hoo, le ’ne le tsoelepele. Le se ke... Le tiisetse ho eona feela. Ua bona? Empa le se hopole hobane kobo ha e sarolohe ho khurumetsa moena oa hao e mong, hape, ea ka hara mokhatlo o mong o (joalo feela) fumaneng Moea o Halalelang ha kaalo. “Molimo o neile ba Mo utloileng Moea o Halalelang.” Le moena e mong o khonne, hape, ua bona, ako e otollele koo. Hoo ho itoketse. ‘Me ha re teaneng re nyakalleng.

<sup>230</sup> Re tètse lefatše. Re Peō ea Abrahama. Re Peō ea Kreste, Peō ea tšepiso. ’Me ke rōna bana, hantle tlase. ’Me ntho ea ho qetela e ne e le efe joale, eo A e neileng ntata rōna Abrahama? Pontšo eo, pele ho Sodoma, pejana ho ho chesoa, le ho fihla ha mora. Joale, pejana Mora oa tšepiso a fihla, le ho chesoa ha Sodoma, Molimo o tšepisitse ka Jesu Kreste e tla etsahala ka nèpahalo, “Joaloka matsatsing a Sodoma.”

<sup>231</sup> Shebang lefatše kajeno. Nalane ea lefatše ha eso bone likhopamiso tse ngata hakana tseo re li fumanang kajeno. ’Me poso ea ka e phophoma ka boommè, ba llang, ho tsoa ka mona California. Ha u bala leseli la litaba, ho thoe khopamiso, khele, e fetohile California, khele, ho ella mane ho lipheresente tse mashome a mararo, e eketsehile ho feta selemo pele ho moo. Khopamiso, e hohle, litšila. Likolo, likolo tsa bolumeli, li tlameha ho leleka batho likolong tsa bona, ba imeloa ke ho tiisetsa. Ba khopameng, “ba fetolang mokhoa oa tlhaho,” joaloka Sodoma, re e bona ka tsela eo.

<sup>232</sup> Shebang Billy Graham, moromuo ea tsoang ho Molimo, tlase mono, o fiela ka Evangelie eo.

<sup>233</sup> Joale, le reng ka Kereke, Mokhethoa? Le Eona e ka khona e fumane pontšo, hape. Na ho joalo? [Phutheho e re, “Amen.”—Mong.] E tlamehile ho e fumana. Bosius bona ke tšepile re tla tela ho se lumele ha rōna hohle, le ho lumela ho Morena Jesu, le ho Mo latela, le ho bona lipontšo tsa Hae tsa letsatsi la ho qetela, ka ha A e tšepisitse ho fihla mona.

Ha re inamiseng lihlooho tsa rōna.

<sup>234</sup> O teng ka mona bosium bona ea sa Mo tsebeng joaleka 'Moloki oa hao, 'me u ka rata ho tèla hohle hona joale le ho Mo latela? Na u ka phahamisa letsoho la hao, ho re, "Nthapelle, Moena Branham. Ke rata ho etsa hoo, ho ba Mokreste oa sebele." Molimo a u hlohonolofatse. E mong o teng? Molimo a u hlohonolofatse. Molimo a u hlohonolofatse. Molimo a u hlohonolofatse, khaitseli. Molimo a u hlohonolofatse, le uena, moena. E mong? Molimo a u hlohonolofatse, monghali. "Nka rata ho tèla hohle. Ke—ke tlil'o etsa hoo, Moena Branham."

<sup>235</sup> Ke batla ho botsa taba. Moena, khaitseli, ha ke—ke ha—kea ikemisetsa ho hlabèhisa motho. Empa, u a bona, u—u—u... U jere boikarabelo ba Lentsoe. "Ekare—ekare ha le lula ho 'Na, le Mantsoe a Ka a le ka ho lona." Ka linako tse ling ke tlameha ho bua lintho tse ntlhabang, haholo ka linako tse ling ho likhaiseli tsa ka.

<sup>236</sup> Hoba, lea lemotha mosali ke seo Satane a se sebelisitseng tšimolohong. Molimo o khethile monna. Satane o khethile mosali.

<sup>237</sup> O ne a hlohonolofatsoe, ehlile, ho ba mosikari ea tlisiseng Jesu Kreste lefatšeng. Joale, Eo e ne e se Mora oa hae. Bohle le tseba hoo. Le ka mohla Jesu ha eso mo bitse 'mè. Ha a ka a ba le... Ke letšoele le tsoa kiloeng, empa nkutloeng. Ha ho peo e tsoang ho Maria. E ne e le popo ka botlalo, moroetsana, ka Molimo. "Moea o Halalelang o ile oa khurumetsa." Lebaka leo Jesu a sa mo bitsang 'mè. E ne e se karolo ea hae, ka letho. E ne e mpa e le mosikari ea sebelisitsoeng ke Molimo, ho tlisa Lesea.

<sup>238</sup> Hoba, efèla haeba letho la mosali eo le ne le ahile ka ho Moshanyana eo, Lesea leo, mosali eo, (lea utloisia; lona batho ba holileng le tseba seo ke se bolelang,) kemariso ea mofuta e ne e tlamehile ho etsahala, peo ea mofuta e tsoe ho mosali eo, ka hono, ka sebele ekabe'bile ketso ea thobalano le Molimo o Matlaohle. E ne e ke ke ea etsoa.

<sup>239</sup> Molimo o bopile lesea, lehe le Mali 'moho. Sele eo 'moho, ea mosali le monna, Molimo o ile a bopa. Ke ka baka leo 'mele oo o ileng oa tsosoa. Ruri. E ne le e letsibolo la tsoho. Ka baka leo ha A ka a mo bitsa 'mè. Ba itse, "'Mè oa Hao kantle ka mona o ntse a U batla."

<sup>240</sup> O itse, "'Me oa ka ke mang?" Ho re, "Ba etsang thato ea Ntate oa Ka, ke 'mè oa Ka." Ua bona? Ka baka leo ha A eso mo bitse 'mè le ka mohla. O mo bitsitse "mosali." Ke seo a neng a le sona.

<sup>241</sup> 'Me bang ba lona batho ba ratehang ba Katolike le mo etsa molimo, kapa molimotsana, mofumahali oa Leholidimo. Ha e a loka. Che, ha se eona. E ne e le mosali ea lokileng. E, monghali. Ka nèpo. Empa o ne a sa fetise mosali ofe eo Molimo a khethang ho mo sebelisa. A ka sebelisetsa mosali ho itseng. A ka mo sebelisa, ka tsela efe. E ne e le mosikari

feela, hoba ke seo a neng a le sona, ho futhumatsa Peō feela, le joalo ka mokhoa oo. 'Me Bophelo bo ile ba kena ka ho Lesea. Empa Mali, hemotlelobini, bohole re tseba ka mehla, e tsoa ho e motona. 'Me Eèna e ne le e motona, 'Mopi. E ne e se Mojuda... Lesea e ne e le... .

<sup>242</sup> Jesu e ne e se Mojuda leha e le Molichaba. E ne e le Molimo. Ke hantle. Molimo ka Sebele o bopile 'mele oo A neng a ahile ho oona. Eo e ne e le Mora oa Hae, Jesu Kreste. Tsoalo e halalelang eo, ea moroetsana e hlahisitse motho enoa, ka kemariso e se nang sekoli ea Moea o Halalelang. Mosali ha a amana le eona ka letho, ka lehe leha e le ka sele ea mali.

<sup>243</sup> Monna o na le sele ea mali. Mosali o na le lehe. Ka mokhoa ona, eka khona ho be le takatso ea mofuta o itseng le kemariso, ho etsahatsa ho hong.

<sup>244</sup> Lebakeng leo, ha ho a etsahala letho haese ho khurumetsoa ke Moea o Halalelang, 'me Molimo oa bopa kahara mosali. Ke 'Mopholosi oa ka eo. Kantle ho Eèna, ho felile ka rôna bohole.

<sup>245</sup> Joale, bang ba lona batho ba mona, lona basali, mohlomong le basali ba Pentekosta, le bile molato oa ho arapa liaparo tse sa hloekang, ho poma moriri oa lona, ho etsa lintho. Kea elelloa mona California, ha ba bangata ha kaalo... .

<sup>246</sup> Kapa, mona Arizona, ke rialo, ba tlolang meikapo ha ba bangata. E ile ea loantšoa, le eona. Be, ha ho letho Bibeleng le u thibelang ho tlola meikapo. Re mpa re e tseba e le phoso, kaha e le mokhoa oa lefatše.

<sup>247</sup> Empa molao o teng kahara Bibele o reng mosali, ea kutang moriri oa hae, ke motho ea tlotlollehang. 'Me haeba e shebeha joalo ho Molimo, 'me u ipolela u na le Moea o Halalelang, u etsa joalo, phoso e teng.

<sup>248</sup> "Ho apara seaparo se kang sa monna." Oh, khaitseli, moratuoa, u se ke ua ipapisa le lefatše. Tèla lefatše. Itšoarelle ho Kreste.

U re, "E etsa phapang efe?"

<sup>249</sup> "Ho lehlohonolo ea phethang melao ea Hae eohle, a tle a fuoe tokelo ho kena Sefateng sa Bophelo." "Ea sitoang ho tse nyenyane o molato ho tsohle."

<sup>250</sup> U tseba hantle ho feta. Haeba u na le Moea o Halalelang, ruri O tla u bolella hantle ho feta. O tla u bolella hantle ho feta, haeba e le Moea o Halalelang.

<sup>251</sup> Joale, haeba u le molato, 'me u batla ho qala bosius bona, le ho re, "Moena Branham, ke ne ke sa e elelloe. Esale ke thella joalo. Ke batla ho qala bocha. Ho tloha mona, ke tlil'o sebeletsa Molimo." Phahamisa letsoho la hao, ho re, "Nthapelle, Moena Branham." Molimo a u hlohonolofatse. Ke sebete ho etsa hoo. Hoo ho hlile ho nka... Molimo a u hlohonolofatse. Matsoho a

mangata. Ho lokile. Molimo a u hlohonolofatse. Hape, haeba u tseba, hore Ntho e teng ka ho uena, e u bolellang u le phoso, u a tseba hobane Molimo o haufi le uena.

<sup>252</sup> Empa ha u utloa Lentsoe le hlakile hakana, le joale u sa lutse mono u re, "Nke ke ka e etsa. Ha a tsebe seo a se buang," athe mona ke ntse ke qotsa Lentsoe, ua bona, etlaba phoso e teng ka se leng ka hare ho uena. Ua bona? E mpa e le ntho e le 'ngoe, ke Satane. Ke phetho. E khahlano le Molimo. E khahlano le likomelo tsa Hae. E khahlano le Lentsoe la Hae.

<sup>253</sup> Motho o itse ho 'na, nakoana e fetileng, moreri ea tsejoang. A re, "Moena Branham." A mpiletsha ka phaposing ea hae, a mpeha matsoho holimo. Ho re, "U tlil'o senya tšebetso ea hao."

Ka re, "Eng?"

<sup>254</sup> Ha thoe, "Ha u phetse ho omanya batho, ka boitšaro ba bona." Ho re, "Horeng u sa . . . batho ba u nka u le moporofeta."

Ka re, "Ha ke moporofeta oa letho."

<sup>255</sup> A re, "Be, batho ba u nka u le eèna. Horeng u sa ba rute lintho tsa moea, mokhoa oa ho amohela masèho a maholo a moea le lintho?"

<sup>256</sup> Ka re, "Nka hla ka ba ruta lintho tsa moea athe ha ba tsebe li—ABC tsa bona? Ha ba na le boitšaro ba tloaelo feela ba ho tsepama le Lentsoe, ha ke sa bua ka lintho tsa moea. Ekare ha ba sa lumele lintho tsa lefatše, ba ka lumela lintho tsa leholimo joang?"

A re, "Be, u tla itšenyetsa tšebetso ea hao."

<sup>257</sup> Ka re, "Tšebetso efe e ka senngoang ke Lentsoe la Molimo, e tlamehile ho senngoa." Khutlelang Lentsoeng. Ke hantle.

<sup>258</sup> Joale, haeba u tsuba lisakrete, le lintho tse joalo, 'me u itlaleha u ena le Moea o Halalelang, ha u soabe. Lona banna! Le re, "Hore'ng u nyefola basali?" Lona banna ba lumellang basali ba lona ho etsa hoo, oh, oa thaka, athe u ipitsa Mokreste, ha u soabe.

<sup>259</sup> Kea tseba hona ho thata. Empa, moena, ke—ke nako ea ho kuta bochitjana. Ke nako ea ho khutla ha Moea o Halalelang, ho nka Monyaluoia oa Hae. Efèla ha e sa tsepame le Lentsoe la Hae, phoso e teng.

<sup>260</sup> Lona ba oeleng, le lulang hae masiu a Laboraro le sa tle mona kerekeng, le shebile lithelebishene, le masiu a mang a kerekeng! Nahanang, u—u hlile u a bua, 'me haeba u tlameha ho tla kerekeng, u tlameha ho ikhatella ka matla, hoba u nahana hore ho e etsa ke molao. U tlameha ho e etsa. Ke hlompho ho e etsa. 'Me ha u sa rate ho e etsa, phoso e teng. O teng Moea o Halalelang o u ratisang ho sebeletsa Molimo.

<sup>261</sup> Joale, ka hono, re sa inamisitse lihlooho tsa röna, bohle ba ikutloang ba batla ho qala le Molimo, bosiung bona,

phahamisa letsoho la hao. Mang le mang ea ka mona joale, phahamisa letsoho la hao, mang le mang, ka mahohle. Molimo a u hlohonolofatse, u hlohonolofatsoe uena, uena, uena, uena, uena. Molimo a u hlohonolofatse. Ke botle. Ke tlil'o le rapella.

<sup>262</sup> Ntate oa Leholimo, joale ke buile Mantsoe a Hao ka ho hlaka le ka bohloeki, a bile a hlaba, ho latela tsebo ea ka. E seng ho fapana; haeba e le morero oa ka oo, Morena, ke 'na ea tlamehang ho namalla aletareng. Empa efèla ha ke bona motho, moena oa ka kapa khaitseli, a noela ka mokoroana oa khale o lutlang, 'me ke sa ba omanyé, kapa ho ba khalema, kapa ho ba inola boemong boo ka mokhoa oa horeng, ekabe'ba ha ke ba rate. Ke ntse ke leka ho ba inola, Morena, ba tle ba pholohe.

<sup>263</sup> Oho Molimo oa Leholimo, ke rapella mang le mang ea phahamisitseng matsoho a bona. Ke bone basali ba bangata ba pompeng moriri oa bona ba phahamisa matsoho a bona, ba teetsoe hare ke mohau o lekaneng ho itseba ba fositse. Ba bangata ba sa etsang hoo. Joale, ke Uena Moahloli oa hoo. Empa kea rapela, Molimo, hore U tle u pholose bao. Aba sena. E leng hore...

<sup>264</sup> Banna bao ba ile ba phahamisa matsoho a bona, banna ba matla ba khabane ba lutseng le mafumahali a bona, le joalo, ba phahamisitse letsoho la bona. Batho ba holileng ba phahamisitse matsoho a bona. Joale, Ntate, re tlameha ho tèla lefatše le lintho tsa lefatše, ho seng joalo re ka sitoa ho U sebeletsa.

<sup>265</sup> Ke U rapela ho Ipontša hoo batho ba tlang ho bona hoo, Lentsoe le seng le builoe. Batho ba ka bua eng le eng. Empa ha Molimo o khutla o thasisetsa Lentsoe la Oona, ho le kholisa e le Lentsoe la Oona, re sala re hloka boitatolo. Kea rapela, Ntate, hore U tle u e abe bosiung bona. 'Me hang ha batho bana...

<sup>266</sup> Bongata ba bona ke baetsalibe. Ba 'maloa ba phahamisitse matsoho a bona, e le baetsalibe. 'Me kea rapela, Ntate, hang feela ha ba bona ponahatso... Le ho U tšepa u tla etsa hoo bosiung bona, ho Ipontša, hore bofelo bo fihlile. Mora ea tšepisitsoeng o se a tla tlela Peō ea Abrahama kapele, le hobane Sodoma e tla chesoaa.

<sup>267</sup> Ka tsatsi le leng ha ho lejoe la Phoenix, le tla sala holima le leng. Phula e tla fieloa e hloeke. Motseng oo bofabe bosiung bona, ho noa khokteile, bommè ba hopang lisakrete, barali, ba tantšang, ba itšothang, ba itšoere joalo, banna ba phelang bohlasoa, sebe sa motse! Oho Molimo, empa ke sheba tlase hara oona, ke a nahana, "Ebe ho leka ho thusa'ng?"

<sup>268</sup> Empa ke nyarela tlase mono 'me ke bona Leseli le lenyenyané *mona* le *mane*, Mokreste ea inehetseng, ea rapelang. "Bohle ba feheloang ba feheloa ke manyala a etsoang hara motse, Lengeloi le kile la laeloa ho ba maneha Tiiso, ho ba tšoaea, 'me e le bona ba neng ba sa tl'o timetsoa." Kea

rapela, Ntate, boholo e tle e be Mokreste ea inehetseng, mora ea builoeng, ea sa tšabeng ho hlabela batho bana mokhosi. Molimo, letsatsing lena, ha re bueng lintho tse nèpahetseng.

<sup>269</sup> 'Me Letsatsi la Kahlolo le a tla, mohla ba tla ema ba hloka boitatolo, hoba Molaetsa oa bosius bona o tla hlahisoa holima lebota, holimo libakeng tse holimo, 'me bohle re tla arabela. Ka hona kea rapela, Ntate, hore U tle u bolotse lipelō tsa bona linthong tsa lefatše, ba tle ba phele ka borapeli lefatšeng lena la joale. Re e kopa ka Lebitso la Jesu. Amen.

<sup>270</sup> Phepi ho le tšoarella. Re...Ke—ke hlile ke siiloe ke nako. 'Me ke—ha ke...Ke tlamehile ke be ke tsoile. Bo fetileng... Bosiung ka bong, ke tsoile ho ella mane, ho hora ea leshome, ha re re re morao. Ke ne ke batlile ho tsoa ka mashome a mararo ka morao ho robong. Ha kea khona.

Joale, motsotsotso feela, ho maneha e—e tiiso holima seo ke se buileng.

<sup>271</sup> Joale, ruri, ha ke moreri. Mang le mang o tseba seo. Ha ke na thuto, 'me ke sebelisa puo ea ka ea khale ea Kentucky ea "his," "hain't," le "tote," le "fetch," le "carry," le "them thar." Le tseba ka hona hobane ha ke moreri. Ke haelloa ke thuto ho ba e mong.

<sup>272</sup> Empa ke Mokreste. Morena Jesu o mpholositse sebeng. Ke tseba hoo. 'Me O mphile Lentsoe le leng ho nèpahatsa lethonyana le ke le tsebang. Ntho feela, ha nke ke leka ho itlhilosetsa ka botho. Ke mpa ke Le bala feela. 'Me sohle seo Le se buang, ke bolela hona hoo. Ua bona? Ke phetho seo ke se tsebang. Ua bona? Joale, haeba e hlahosoa ka phoso, ha ke tsebe. Ke mpa ke bua ho latela botoloki bo *mona*. Ua bona? 'Me esale A e tšeheilitse, le ho e emela.

<sup>273</sup> Kea lumela Jesu Kreste o khutla kapele. Kea lumela E sa le Jesu eo, maobane, kajeno, le ka mehla. Kea lumela O itse, "Ho se ho se ho kae, 'me lefatše," cosmos, tsamaiso ea lefatše, "ha le sa re bona...ha le sa tla Mpona. Empa, lona lea Mpona, lona, Kereke, hobane 'Na," leemeli la motho, "Ke tla ba le lona, le ka ho lona, ho isa bofèlong ba lefatše. Mesebetsi eo Ke e etsang le lona le tla e etsa." Le lumela seo? [Phutheho e re, "Amen."—Mong.] Re fumana mesebetsi eo A e entseng, kamoo A Ipontšang.

<sup>274</sup> Kea rapela, bosius bona, hore Molimo o tle o nke kerek ena...Joale, ho sa tsottelehe kamoo A ka ntlotsang, le lona O tlameha ho le tlotsa, hape. Ua bona? Ho sa tsottelehe kamoo Moea o Halalelang o ka lekang ho bua *mona*, O tlameha ho fumana letho ka ntle *mono*, le e utloang.

<sup>275</sup> Jesu o kile a feta sehlopha sa batho, tsatsi leng, se ntse se hooeletsa, "Rabbi, Rabbi, ha se le thabo ho ba le uena mona, *hore—le—hore*." Jesu a 'na a itsamela.

<sup>276</sup> Eaba ho fihla mosajana ea amang mosèho oa seaparo sa Hae, eaba o khutla a lula fatše. Jesu a ema a re, “Ke mang ea Nkamileng?”

<sup>277</sup> Khele, Simone Petrose a re ho Eèna, eka hoja, khele, a hla a Mo khalema. A re, “Be, U ka rialo joang? Mang le mang o ntse a U ama.”

<sup>278</sup> A re, “Empa Ke ikutloile Ke tšerema. Molemo,” e leng matla, “o tsoile ho ’Na.”

<sup>279</sup> A qamaka hohle holima letšoele. Motho ea neng a Mo lumela o ne a le teng. Ho sa tsottelehe, mohlomong mono ho lutse makholo, empa ha eba le motho ea lumetseng. A fumana mosajana eo, a ’molella ka phallo ea hae ea mali, e neng e khaolitse, ’me o ne a folile. Na ho joalo? [Phutheho e re, “Amen.”—Mong.] A tsoelapele hantle. Ua bona? Esale Eena maobane, kajeno, le ka mehla.

<sup>280</sup> Joale, re ntšitse litlankana tsa thapelo. Re ntšitse halofo ea tsona, mono bosiu bo fetileng, halofo ea tsona bosiung bona.

<sup>281</sup> Na re qalile ka ea pele, bosiu ba ho feta? Na re qalile ka ba pele ba leshome le metso e mehlano kapa ba mashome a mabeli, bosiung ba ho feta, ho qala ho ’ngoe ho fihlisa *hore—le—hore?* Ke eng? Ho thoeng? [Motho o re, “Mashome a mabeli.”—Mong.] ’Ngoe ho fihla ho mashome a mabeli. Ho lokile. Bongata ba bona bo teng bosiung bona.

<sup>282</sup> Ha re li qaleng morao, ke hona. Ha re qaleng. Ha re boneng. Re na le metsotsø e leshome le metso e mehlano, ha re ntšeng litlankana tse leshome le metso e mehlano, ke hona. Ha re boneng, e tla ba mashome a robeli a metso e mehlano ho fihla ho lekholo. Ha re qaleng ho mashome robeli a metso e mehlano, ho fihla ho lekholo.

<sup>283</sup> Ke mang ea tšoereng setlanakana sa thapelo sa mashorobeli—hlano? Phahamisa letsoho la hao. Mashorobeli—hlano, mosali morao mono? Nyolohela koano, khaitseli. Mashorobeli—tšeleta, ke mang ea tšoereng mashorobeli—tšeleta? Hantle mona. Mashorobeli—supa, mashorobeli—supa. Motho a phahamise letsoho la hae, mashorobeli—supa. Monna enoa, mashorobeli—supa. Mashorobeli—robeli, mashorobeli—robeli. Mashorobeli—robong, mashorobeli—robong. Mashorobong, mashorobong—’ngoe, mashorobong—peli, mashorobong—tharō, mashorobong—’ne, mashorobong—hlano, mashorobong—hlano. Yaa. Mashorobong—tšeleta, mashorobong—supa. Mashorobong—tšeleta, ha kea e bona e phahama, mashorobong—tšeleta. Joale, haeba u tšoere setlankana sa hao, tloo. Ua bona? Mashorobong—supa, mashorobong—robeli, mashorobong—robong, lekholo le le leng. Ho lokile. Ere batho bana... ’Ngoe, peli, tharō, ’ne, hlano, tšeleta, supa, robeli, robong. Ho haella ba ka bang robeli.

<sup>284</sup> Joale mamelang. E lokile. Se tle mona ka sebe se leketlileng bophelong ba hao. U mpe u se bolele ka ntle koo, ho Molimo. Empa haeba—haeba u entse hoo, haeba u ipoletse sebe sa hao, u ka tla hle.

<sup>285</sup> Ba ka ntle koo ba sa tšoarang setlankana sa thapelo ba ba kae, 'me u batla ho folisoa ke Jesu? Phahamisa letsoho la hao. Ba tla lumela ba ba kae, haeba Jesu Kreste a ka etsa... Haeba A... Ba lumelang see ba ba kae?

<sup>286</sup> Shebang. Ke tlil'o botsa bareri ba ka sekotlong sa ka mona. Baena, na ke 'nete, joaleka bareri ba Evangeli, rea lumela hore Bibele, e leng Testamente e Ncha, Buka ea Baheberu, e re, ho thoe, "Ke Moprista e Moholo hona joale"? [Bareri ba re, "Amen."—Mong.] "Moprista e Moholo ea ke keng a sitoa ho angoa ke maikutlo a mahlomola a rōna?" Na ho joalo, baena? ["Amen."]

<sup>287</sup> Ba ba kae ka ntle koo ba tsebang Bibele e rialo, "Moprista e Moholo"? [Phutheho e re, "Amen."—Mong.]

<sup>288</sup> Be, efèla ha E le Moprista e Moholo ea ka angoang ke maikutlo a mahlomola a rōna, joale, ebe U sebelitse joang? Efèla haele Eèna maobane, kajeno, le ka mehla, ebe O sebelitse joang mohla motho a na a Mo ama ka maikutlo a mahlomola a bona? Mosajana oa phallo ea mali, ea kileng a Mo ama, ka hobane a ne a mo ama ka tlhoko; O ile a retoloha, a ba a ho qamaka ho fihlela A mo fumane, a ntano mo bitsa. Na ho joalo? Na ho joalo, baena? [Bareri ba re, "Amen."—Mong.] Joale, efèla haeba E le eèna Moprista e Moholo eo, O tla tlameha ho itšoara ka mokhoa oo, hobane Ke eèna—Ke eèna Moprista e Moholo. Na ho joalo? ["Amen."] Be, O tla tšoanela ho itšoara ka ho tšoana.

<sup>289</sup> Joale, ha le hloke litlankana tsa thapelo. Che. Ha le hloke setlankana sa thapelo. Le hloka feela tumelo ho Molimo. Eba le tumelo, lumela ka pelo eohle ea hao hore Jesu Kreste o folisa bakuli le ba hlomohileng, 'me ruri O tla e phethisa.

<sup>290</sup> Joale, ha re inamiseng lihlooho tsa rōna nakoana thapeleng joale, hape, pele ho buuoa kapa ho etsoa letho. Joale, ha ke re O tla etsa hoo. Ke tsepile hore O tla etsa hoo. Empa ke—ke lumela, 'me ke tsepile A tla etsa hoo. Joale, haeba A tla e etsa, ba ba kae ba lona ba tla lumela? Phahamisa letsoho la hao. A ke a e abe, ke thapelo ea ka.

<sup>291</sup> Ntate oa Lehlimo, joale ke buile seo Lentsoe la Hao le se buang, "Ho tèla tsöhle, ho latèla Uena." Bao ba kileng ba tèla tsöhle, ba khonne ho U bona. 'Me ho sa tsotelehe seo U ka se etsang, bao ba sa tl'o tèla sebe 'me ba latele, ba ke ke ba utloisia. Bao ba telang sebe, ho se lumele...

<sup>292</sup> Sebe re se tseba e le ho se lumele. Ho sa tsotelehe khalalelo eo re ka e phelang, sohle seo re se etsang, efèla ha re sa lumele, re baetsalibe. Bibele e re, "Ea sa lumeleng o se a ahlotsoe."

Ka baka leo re itseba re tlameha ho lumela “Lentsoe le leng le le leng le tsoang molomong oa Molimo.” Hoo eka khona e be bohobe ba rōna ba letsatsi.

<sup>293</sup> 'Me kea rapela, Ntate, ho re, joalokaha ke qotsitse Mangolo bosiung bona, litsepiso tsa Hao tsa matsatsi ana a ho qetela, le seo re neng re tla se lebella matsatsing ana a ho qetela. Haeba e ne e nèpile, Morena, ako nèpahatse Mantsoe ana ka lipontšo tse latelang. Aba sena.

<sup>294</sup> Ke ikhethela Uena, le Lentsoe, le batho. Kea rapela, Ntate, hore U tle u bolotse lipelō kantle mono, ho lumela ka pelō ea bona eohle, haholo bana ba tla kena moleng oa thapelo. Hape batho ba ke ba lemohe hobane Messia, Jesu Kreste, Moea o Halalelang, o na le rōna bosiung bona. O ka hara Kereke, Kereke ea Mokhethoa, ba bitsitsoeng, Peō ea Abrahama, ka pallo ea borena. Aba sena, ka Lebitso la Jesu. Amen.

<sup>295</sup> Joale, e reng ke shebe feela, nakoana. Joale, re tla nka nako ea rōna, metsotso e 'maloa feela, e 'maloa feela, metsotso e ka bang leshome.

<sup>296</sup> Lea Mo rata na? [Phutheho e re, "Amen."—Mong.] Lea Mo lumela na? ["Amen."] Ana le lumela lintho tseo ke le baletseng tsona li tsoa Lentsoeng bosiung bona ke 'nete? ["Amen."] Ana lea lumela Jesu o entse hoo mohla A na a le holima lefatše? ["Amen."] Ana lea lumela O e tsepisitse? ["Amen."] Ana lea lumela re matsatsing a bofelo? ["Amen."] Joale, eo ke tsepiso ea Hae. O tsoanetse ho e phela. "Ekare ha le lula ho 'Na, Mantsoe a Ka a ahile ka ho lona, le ka kopa seo le se ratang. Le tla se etssetsoa." Joale, morero le sepheo sa hao se tlameha ho nèpahala. U tlameha ho lumela hoo ka pelō eohle ea hao.

<sup>297</sup> Joale, ha ke lumele ke tseba motho moleng oa thapelo. Re basele. 'Na ke osele. Ka ntłe *mono*, ke basele. Ba tsebang ke sa tsebe letho ka lona, lona ba moleng o monyenyane oona oa thapelo *mona*, phahamisa letsoho la hao, ea tsebang ke sa tsebe letho ka uena. Hantle. Bohle ka ntłe *mono*, ba tsebang ke sa ba tsebe, kapa ke sa tsebe letho ka uena, phahamisa letsoho la hao, bonang feela. Ke moo he. Ka hona, ke taba e patiloeng. Ba nang le litlankana tsa thapelo ke *bana*. Ea se nang ea ho rapelloa ke *eane*...

<sup>298</sup> Setlankana sa thapelo ha se letho haese setlankananyana se ngotoeng palo holima sona. U mpa u fuoa palo feela, moshanyana o ye a theohe a li fehle, 'me mang le mang ea batlang setlankana sa thapelo a ka se fumana. 'Me ha a tsebe, ha ho mang ea tsebang, kae. Be, a ke ke a tseba haeba litlankana tsohle li fehluoe, ho tloha tulong e 'ngoe ho isa ho e 'ngoe. Ha ba ke ba tseba ea tlāng ho kena moleng oa thapelo, kaha re ke ke ra bolela hoo. Hangata, re li theolela tlase mane...

<sup>299</sup> Mohla ke ne ke qalisa, re kile ra qhautsa motho ea rekisang litlankana tsa thapelo tlase mono. Motho a re, “Ke tla u fa didolara tse makholo a mahlano ho kenya mosali oa ka moleng oa thapelo.” Ua bona?

<sup>300</sup> Eaba ke nka mora oa ka ka sebele. Eaba ke re, “Mora, ho itlhakisa pela batho, ba tle ba u tsebe u sa tl’o rekisa setlankana sa thapelo, nyolohela pela bona, u lubakanye litlankana tsa thapelo *tjena*, u ntano li abela mang le mang ea batlang. ‘Me ntle le moo, mora, u ke ke ua tseba moo ke tla qala ho bitsa haese ha ke fihla tlase mono.’”

<sup>301</sup> Ba e boneng ka hara kopano ba ba kae, nako le nako khafetsa? [Phutheho e re, “Amen.”—Mong.] Nako le nako feela, ke ee ke hlanohe, ’me ke fetele *mona, mono*. ’Me hape, ntle le moo, ha e mong a folisoa kalaneng, ka ntle *mono* ho bitsoa tosene, ua bona, ke hantle, a sa tšoaroa setlankana sa thapelo.

<sup>302</sup> Ke hona ho se tlaile ha Morena Jesu Kreste, eèna maobane, kajeno, le ka mehla.

<sup>303</sup> Ana u tla tèla sohle, ho Mo latela? Ana u ikemiselitse ho tela ho se lumele ha hao, ho Mo sala morao ho fihla pholisong? Ho tèla lintho tsa hao—hao tsa lefatše, ho Mo latela khalalelong, le ho khatha tema le Eèna. Etsa hoo hona joale. Ha ke re O tla etsa hoo. Haeba A ka etsa, ke moo le tlang ho tseba.

<sup>304</sup> Mosali enoa ea emeng *mona* hantle, ena e boetse ke—ke papiso, mokana ke boletse bosiu ba ho feta, ea Mohalaleli Johanne 4. Monna le mosali ke bana, ba kopana la ho qala bophelong. ’Me e ne e le setulong se itseng. Ha u kile ua fihla mono Samaria, ka ntle ho Sikare mono, ke e—e seliba se se nyenyane. Ponahalo ea mono, merara e metse mahlakore a eona, ka tsela *eo*. Ke hona moo mosali a ne a lutse, a buisana le Jesu. Monna, mosali, ba kopana khetlo la pele. Eaba O bolella mosali eo bothata ba hae. Bothata ba hae e ne e le bona, o ne a tletse sebe.

<sup>305</sup> E ka be e le eèna. E ka ba moetsalibe. E ka ba moikaketsi. E ka ba mohalaleli. E ka ba pholiso o e batlela ’mele oa hae. E ka ba pholiso o e batlela motho osele. E ka ba o na le lichelete. Eèna, morero oa hae mona ha ke o tsebe. Ke sitoa ho le bolella. O mpa a eme mono, mosali. Ke phetho. Ke ’nete *eo*. Ha re eso kopane. Empa ha Morena Jesu a ka fihla mona . . .

<sup>306</sup> Joale, ho mo folisa, haeba a kula, nke ke ka khona. Nke ke ka etsa seo Molimo o seng o se entse. Joale, ntho feela . . .

<sup>307</sup> Hola Jesu a ne a eme mona a apere sutu ena? Holane a nyolohela ho Jesu a re, “Jesu, ana U tla mpholisa?”

<sup>308</sup> Be, O ne a tla re, “Ngoana oa Ka, Hoo Ke se ke ho entse. Ka na ka tetekeloa makhopo a hao. U ne u folisoe ka maqeba a Ka.” Na ho joalo? [Phutheho e re, “Amen.”—Mong.] Ke mosebetsi o seng o phethiloe.

<sup>309</sup> U ka tla, ua re, "Jesu, ana U tla mpholosa? Ana U tla mpholosa?" Ha se eona potso. O se a entse hoo.

<sup>310</sup> "Morena Jesu, ke amohela Pheko ea Hao. Ke moetsalibe." Ua bona? U ne u pholosoe morao mono. U ne u folisoe morao mono. U mpa u e amohetse feela. U bolokehile ka tumelo. U amohetse pholoso ea hao ka tumelo.

<sup>311</sup> 'Me mang le mang ea fihlang, ba ipolela matla a pholiso, 'me ba ka u folisa, u be...u suthele thoko le hoo, hoba hase eona. Matla a pholiso a ka ho Kreste, mosebetsi o seng o phethiloe.

<sup>312</sup> Motho ea reng ho uena Molimo o mo file matla a ho tšoarela libe tsa hao, le ho etsa hoo, u se ke ua e lumela. Li se li tšoaretsoe. Jesu o eme mona bosiung bona, ntho feela ke hore, e tla itlaleha E ne e le Mora oa Molimo.

<sup>313</sup> Ho ka thoeng haeba A ne a...Ho ka thoeng hola hona joale matsoho a ka a tletse mehoabali ea lithakhisa, 'me a a fopha mali, le lítšehlo li hlabile *mona*? Ho sa ntse ho sa tl'o e fetola Jesu. Eo e tla be e le nama ea ka.

<sup>314</sup> 'Me rea tseba nama e lutse letsohong le letona la Molimo. 'Me mohla e khutlang, nako ha e sa tla ba teng. Ke hantle. Mohla Jesu a theohang, ho tla be ho felile.

<sup>315</sup> Empa O teng mona ka sebopheho sa Moea. 'Me hape Bophelo ba Hae bo ahile ka ho uena le 'na, ho fa 'na tumelo le uena tumelo.

<sup>316</sup> Joale, shebang mona. Maekrofounu ona—ona, holane lentsoe le phelang le sa buele ka hara oona, o ka be o mumufetse ka botlalo. Na ho joalo?

<sup>317</sup> Joale, shebang. Le mamele ka hloko, le se e fose joale. Tseko ena, ha Molimo o ka fèla oa e etsa, e tla batalatsoa.

<sup>318</sup> Joale, maekrofounu oona o ke ke oa bua ka letho, kaha o se na letho ho bua ka lona. Na ho joalo? Joale, mokhoa oo maekrofounu oo o ka buang, keha ntho e buela ka ho oona.

<sup>319</sup> Joale, ke 'na enoa. Ha ke tsebe mosali eo, ha ke eso 'mone. Ao ke matsoho a ka ka pela Molimo, le eèna o phahamisitse matsoho a hae, ho thoe ha re tsebane. Ha ke tsebe letho ka eèna. Empa, pele ntho e kena ka *mona*, ho bolela se phoso *mono*, ke semumu, le 'na, hoba ha ke tsebe letho. Molimo o a tseba hoo ke 'nete. Ua bona? E teng Ntho e tlamehang ho bua.

<sup>320</sup> Joale, u ka ikhethela. Haeba uena, joaleka Filipi, o itse... Kapa, Nathanaele o itse, "U Kreste, Mora Molimo o phelang. U e—e Morena oa Iseraele." Ua bona? Kapa, u ka ba bao ba e reileng Belsebule. Na le bona moo ba leng teng bosiung bona? Kea ipotsa Nathanaele o kae bosiung bona? U apere ho se shoe. Ua bona? U ka ikhethela. Ho ho uena. Ua bona?

<sup>321</sup> Empa joale ke rialo, ho emela ho bona haeba A tla ntheolela tlolo. Haeba A sa ntheolele tlolo, nka etsa ntho e le

'ngoe feela, metsoalle, ke ho kopa tšoarelo, haele moo A sa kopana le 'na bosius bona. 'Me ke moo re tlang ho bea batho ba kulang bana matsoho re ba rapelle, le ho kopa lesèho, ho memela aletare, le ho ea hae. Ke phetho seo re ka se etsang. Ke phetho seo ke tsebang ho se etsa.

<sup>322</sup> Empa ha A ka fihla, ke nahana mang le mang oa lona ba phahamisitseng letsoho, le itseng le batla ho bona Kreste, ke hopola e le tšoanelo ea lona, hang hoba hona ho fete, ho theohela hantle tlase mona le ho khumama, le ho re, "Morena Jesu, joale ke inehela ho Uena."

<sup>323</sup> Hobane, haeba ke le raleshano, A ke ke a netefatsa raleshano. A ke ke a amana le sebe ka letho. Molimo o ke ke oa khona. Empa efèla haeba ke le boleletse 'Nete, O tla be a tlanngoe ke Lentsoe la Hae, ho—ho—ho paka hoo e le 'Nete.

Molimo, e abe.

<sup>324</sup> Joale aparang tšabo feela. Ua bona? Hohle hara letšoele, le apare tšabo feela.

<sup>325</sup> Nka tlameha ho qoqa le uena motsotso feela, mofumahali, ntho e 'ngoe feela. Ha ke utloe tlolo holima ka. 'Me ha ke—ke u tsebe, le hona ho joalo. Joale, ntho feela eo ke batlang u e etse, ha ke u botsa taba, e re feela "e" le "che." Ua bona? Joale, morero oa ka ho etsa hona . . . Ha re nkeng ntho e 'ngoe, e tle e khone . . .

<sup>326</sup> Ha re batle ho kheloha Lengolo le ka mohla. Ako tiisetse Lengolo hantle, ke moo re tsebang hobane re nèpile.

<sup>327</sup> Joale, ho tea mohlala, Jesu, joale, O ne a etele naha e 'ngoe. A le tseleng ea Hae e eang Jeriko, e le tlasa thaba. Empa A hloka ho pota le Samaria, holimo ka nqa *ena*. Joale, mono O ne a romiloe ke Ntate. Jesu o itse . . .

<sup>328</sup> Khaolong e latelang, khaolo ea 5, mohla A na a folisa monna oa bothata bo itseng. Mono keha ho robetse likete tsa batho, bongata bo shoeleng litho, lifofu, liritsa, ba omeletseng litho, ba emetse phuluho ea metsi. Eaba Jesu o a feta, 'me A bona monna ea hlopshoang ke boletse, mohlomong TB, kapa bothata ba prostate, kapa ho hong. Eaba O a mo phelisa, ka hobane A mo tsebile a le teng mono, le ho mo tseba a le joalo. Ho tsoela pele, a siea bongata mono. A tloha, a ikela. Rea tseba hoo ke 'nète. Ho joalo? [Phutheho e re, "Amen."—Mong.]

<sup>329</sup> Eaba ba fihlala, Bajuda ba kopana le Èèna, ba Mo botsa. Le bosiu bona ba ka boela ba Mo botsa. "Horeng A entse hoo? Haeba A le kutloelobohloko, a bile a rata bohole, horeng A ka siea bongata boo bohole bo shoeleng litho, lifofu, liritsa, ba omeletseng, bo robetse mono?"

<sup>330</sup> Ho folisa monna a le mong èèna a sa kule ha kaalo. A sa tl'o bolaoa ke hona. Esale bo mo tšoara, lilemo tse mashome a mararo a metso e robeli. A mpa a sitiseha feela. A khona

ho tsamaea. Ho re, “Ere ke sa titimela letšeng, motho a nkete kapele.” Ua bona? “Motho a nkeme kapele.” Empa eaba O folisa a le mong eo.

<sup>331</sup> ’Me mohla A na a botsoa, Mantsoe a Hae ke ana. Mohalaleli Johanne 5:19, “Kannete, nete, Ke re ho lona, Mora o sitoa ho etsa letho a Inotši; haese seo A se bonang se etsoa ke Ntate, Mora o se etsa joalo le èena.”

Ka hona mohla A na a nyolohela Samaria, Morena ke eèena ea Mo isitseng holimo mono.

<sup>332</sup> Joale, Morena o ntataisitse, ’na mohlanka oa Hae, ho ea Phoenix. O ntataisitse ho tla koano bosiung. Joale ke ’na enoa, ke lhahisa maipolelo a Hae.

<sup>333</sup> Joale, mohla Jesu a ne a nyolohela Samaria, ntho ea pele A fumana mosali ea emang pela Hae. A buisana le eèena ho fihlela A fumane bothata ba hae. Eareha A ’molella, ka potlako a e lemoha e le moporofeta kapa Messia ea tsepisitsoeng. O ipoletse E ne e le Messia. Ua bona?

<sup>334</sup> Ka hona re tseba baporofeta ba lhahile matsatsing a fetileng. Kajeno ke Kreste. “Molimo mehleng ea khale o buile le bontate kamekhoa e mengata ka moporofeta; letsatsing lena la ho qetela ka Mora oa Hae, Kreste Jesu,” e leng Moea o Halalelang ka ho rôna.

Joale O teng mona.

<sup>335</sup> U eleloa taba eo. [Khaitseli o re, “E.”—Mong.] Ke batla ho u botsa, joaloka Mokreste ho e mong. Hang hoba ke shebe mono, u ne u ka bolela hore ntho e etsahetse, Moea o mosa ruri, o ikokobelitseng. Na ho joalo? Phahamisa letsoho la hao ha e nèpahetse, batho ba tle ba bone. Ua bona? Joale, hona joale, ka ho sheba mosali, ha u ka mo bona, ho bona mono, ho na le Leseli le lesehla. Le ntse le likoloha mosali eo.

<sup>336</sup> Joale ke eo o tloha ho ’na. Che. Le ile ho motho e mong. Ke mosali e mong. Ke, u ntse u rapella mosali, motho e mong. Ke matsalao. [Khaitseli o re, “È.”—Mong.] ’Me o jeoa ke e—e phieo. [“E.”] ’Me—’me phieo ea hae ’ngoe to. [“E.”] ’Me u tshohile hore ke mofetše. Ke oona morero oa hao mona, ho nkopa ho mo rapella. [“E.”] Hoo ke HO RIALO MORENA. U a lumela na? Tsamaea, u lumele ka pelō eohle ea hao, ’me ba ke ke ba tlameha ho e tlosa. U se ke ua belaela. Nka nthoana e u e tšoereng letsohong la hao, u e behe holima hae.

<sup>337</sup> Le lumela ka pelō eohle ea lona? [Phutheho e re, “Amen.”—Mong.]

<sup>338</sup> U phela joang? Le rôna, ha re tsebane, e mong nqa e mong. Ke kopano ea rôna ea pele. ’Me haeba... Molimo, ka Mora oa Oona, Jesu Kreste, o rometse Moea oa Oona. Jesu o itse, “Moo

ba babeli kapa ba bararo ba kopaneng ka Lebitso la Ka, Ke tla ba hara bona." Eo ke tsepiso ea Hae, ha se eona? Joale, A ke ke a hlokomoloha tsepiso ea Hae.

<sup>339</sup> Ntho e 'ngoe feela, eona, tumelo ea rōna e botsoa haholo, ho fihlela re sa Mo bone. Ke ka baka leo Molimo o rometseng baporofeta lefatšeng. Ua bona, batho ha ba bale Bibele ea bona. 'Me ha ba—ba etse hoo. Ba mpa ba ikela, ka baka leo Molimo o ba romella pontšo ka mehla. 'Me ka tloaelo moporofeta ke pontšo. Ua bona? 'Me kajeno Moea o Halalelang ke Pontšo ea rōna, hobane Ke Moporofeta oa Molimo ea tsamaeang ka ho rōna. Ke Moporofeta oa Molimo, Pontšo ea matsatsi a bofelo.

<sup>340</sup> Joale, ha ke u tsebe, ebile ha ke tsebe letho ka uena. Empa ha Morena Jesu Kreste, etsoe ke sa tsoa e bolela, ho tsoa Bibeleng, a ka bua ka 'na a mpolella sepheo sa ho ema ha hao mona, e tla u lumelisa na? [Khaitseli o re, "E."—Mong.] Na e tla lumelisa letšoeloe lohle? [Phutheho e re, "E."]

Joale, Ntate o ne ntse a mametse. Kea tseba.

<sup>341</sup> U jeoa ke maemo a linerefe. Hoo ho lokile. Ha e lokile, phahamisa letsoho la hao.

<sup>342</sup> Joale, motho o teng kantle mono ea hopotseng ke akantse taba eo. Joale, u ke ke ua e pata joale, moena. E kena ka mona. Ua bona? Ke tsoere hoo. U se ke ua lumela hoo. U se ua e lumela le ka mohla. Seo ke sebe. Ke ho se lumele. Molimo o tla u ahlolela eona. U tla arabela ka Letsatsi la Kahlolo. Ke tlameha ho bitsa hoo, empa ka tloaelo ke kena bothateng.

<sup>343</sup> Ha ke tsebe seo A u boleletseng sona. Nakoana feela. Yaa, ke seo, seriti. Ke linerefe, bofokoli. U fokolisoa ke eona, ho ferekana ka hohle, e u hlophile halelele. Ke hantle. U sa na le bothata bo bong, hape. U ntse u rapella motho e mong. Monna oa hao, ka hara kokelo, o jeoa ke mala, o sa tsoa etsoa oporeishene. Mof. Good, ikele lapeng, u lumele ka pelō eohle ea hao. 'Me u behe ntho eo holima hae, 'me u—u tla fola. Molimo a u hlohonolafatse.

<sup>344</sup> Na ebe O a le tseba? Ua bona? Ehlide, U etsa joalo. Kea bona. Hoo ke...Na ha le elelloe hobane Jesu ea tsamaileng Galilea ke eèna Jesu ea leng mona bosiung bona? [Phutheho e re, "Amen."—Mong.] Na ha le elelloe hoo? ["Amen."]

<sup>345</sup> Joale, ha ke tsebe letho ka...Ke khlooa e le eèna mosali ea rapeletsoeng, hantle *mono*. Na ho joalo? O teng oa lona ea tsebileng mosali eo? Motho mang ea tsebang mosali eo? Phahamisa letsoho la hao. Ana lintho tseo li ne li nepahetse? Tsokotsa matsoho a hao, haeba ho le joalo. Hantle *mono*. Ke botle.

<sup>346</sup> Tloo. U bua Englishi? [Moena o re, "E, monghali."—Mong.] Hoo ho itoketse. molIndia? ["molIndia."] Kea u hlompha, u Moamerika oa makoma. ["E, monghali."] Ha ke nahane... 'Na,

ke motho a le mong feela, ke sitoa ho etsa qeto. Nka etsa qeto e le 'ngoe feela. Ha ke kholoe ba le sebeletsa ka tšoanelo. Ü a tseba hore ha ke e kholoe. Ke nahana, sebakeng sa ho romela limilione le libilione tsa didolara, mose ho maoatle, ba tlameha ho hlokomela lona batho ting. Hantle. Hantle. Ke hantle haholo. Haesale pelō ea ka e le utloela bohloko. Mohla ke ne ke etetse kampong holimo koana San Carlos, nakoana e fetileng. Kamoo Moea o Halalelang o haotseng ka mono, oa folisa batho bao ba batho!

<sup>347</sup> Ke molata ho uena, monghali. Ha ke u tsebe. Ha ke eso u bone bophelong ba ka. Ha re tsebane ka botlalo. Ke hantle. Re merabe e mebeli. 'Na ke moAnglo—Saxon; uena u moIndia. Ke na le malinyana ao ka ho 'na ho tsoa ho 'mè. Nkhono e ne e le moCherokee. Ke motlotlo ka eona. Hantle. Empa joaloka moena oa ka, nke ke ka etsa letho ho u utloisa bohloko. Nka u thusa feela.

<sup>348</sup> Morabe oa maIndia, e ne e le temalo, enereha ha ba fumana motho hara bona, ea khonneng ho lepa a ba supisa liphoofolo tsa letšolo, o ne a beoa moporofeta hara bona. 'Me e ne e le bona. Empa enereha a lepa ntho e sa lokang, o ne a bolaeloa hona. O ne a tlamehile. Ke hantle. Ba ne ba sa fanye ka bona.

<sup>349</sup> Haeba Molimo e le Molimo... Koana ekaba naha e le sebelitse hampe, empa Molimo o ke ke oa etsa hoo. O le romeletse Mora oa Oona.

<sup>350</sup> Ke sa tsoa bona se hlahileng. U sa khutla kokelong. [Moena o re, "Ke hantle."—Mong.] Uh—huh. U tlide koano ho rapelloa. U jeoa ke mala, 'me u mothating oa ho sehoa. ["E."] Hoo ke HO RIALO MORENA. Tloo mona.

Ntate oa Leholimo, ke khalema bothata bona ba mala.

<sup>351</sup> Satane, u kile ua ipatela ngaka, empa u ke ke ua ipatela Molimo. Tsoa ho eëna, ka Lebitso la Jesu Kreste. Amen.

U se ke ua touta ka eona. Ikele, u be u loke.

Lea lumela? [Phutheho e re, "Amen."—Mong.]

U phela joang?

<sup>352</sup> Mofumahali enoa ea lutseng hantle *mona*, o ntse a rapela, feela ka mora mosali enoa ea lutseng ka pele, o jeoa ke senya, u a lumela Morena Jesu o tli'o u folisa, mofumahali? [Khaitseli o re, "Kea lumela O entse hoo."—Mong.] Ke eona.

<sup>353</sup> Mpolelleng o amile Mang. O eme maoto a mashome a mabeli hole le 'na. O amme Moprista e Moholo, ke hantle, ea ka angoang ke maikutlo a mahlomola a rōna. Ana ha le lumele hoo? [Phutheho e re, "Amen."—Mong.]

<sup>354</sup> U a lumela, mofumahali? [Khaitseli o re, "E."—Mong.] U a lumela Molimo a ka mpolella bothata ba hao? ["E, ke etsa joalo."] Ha se uena ea nang le mathata. Ke khaitseli ea hao.

[“Ke hantle.”] O jeoa ke mofetše. [“E.”] Ke hantle. U se ke... Lumela. U se belaele. Nka sakatuku eo u mo boloketseng eona, u e behe holima hae. Lumela ka pelō eohle ea hao. O tla tsoa ho eona. [“Oho Jesu!”] U tla lumela ka pelō ea hao eohle. [“Kea U leboha, Jesu.”] Theohela tlase. Uh—huh.

<sup>355</sup> E bang le tumelo. Le lumela ka pelō eohle ea lona? [Phutheho e re, “Amen.”—Mong.]

Le tlohile kalaneng. Le hara letšoelle.

<sup>356</sup> Ke mosajana, e mosesane ea lutseng hantle morao *mono*, o jeoa ke TB. O lutse morao mono, o ntse a rapela. U a lumela Molimo o tla u folisa? U etsa joalo? Mofumahatsana ea shebileng hantle ka kotloloho, ka morao motšeо koana. Phahamisa letsoho la hao, morao mono, mofumahali, ka mora monna eo ea retolohang. Lumela ka pelō eohle ea hao. E. Mothoana, mosajana ea pommeng moriri oa hae. Ke hantle. Ke eona. E lumele, ’me ho felile.

<sup>357</sup> O amile eng, morao motšeо koana? Ke le phepetsa ho e lumela.

<sup>358</sup> Ho thoeng ka uena, mofumahali? U a lumela bothata boo ba mokokotlo bo u lesitse, ho tloha u eme mona? Be, ka hona, ikele u tsamaee. Ke phetho seo u tlamehang ho se etsa. [Khaitseli e re, “Kea U leboha, Jesu.”—Mong.] E lumele ka sohle se ka hare ho uena.

<sup>359</sup> Le uena u ne u jeoa ke hoo. Ka baka leo hola u ka lumela feela, lula u ntse u tsoelapele, u re, “Kea U leboha, Morena. E folise.” Lumela ka pelō eohle ea hao.

<sup>360</sup> U tšohile ho holofatsoa ke athritisi. Ha u joalo? Ka hona haeba u lumela, lumela ka pelō ea hao, tsamaea. Lumela ka pelō eohle ea hao, ’me u phele. Ke phetho seo u tlamehang ho se etsa, ke ho lumela.

<sup>361</sup> Lea lumela? [Phutheho e re, “Amen.”—Mong.] Ho ka thoeng ka lona batho ba ka ntle mono? Ana le tumelong, lea lumela?

<sup>362</sup> Ha nka re ho uena Jesu o u folisitse, uena ea emeng mono, na u tla e lumela? [Khaitseli e re, “Amen.”—Mong.] Qala feela u tsamaee, ua bona, ho lumela ka pelō eohle ea hao.

<sup>363</sup> U batla ho ea hae, ho ja sophoro ea hao? Ho lumela ha linerefe tseo tsa mala li u tlohetse? Tsamaea, ejha ha u batla. Lumela.

Lea lumela na? [Phutheho e re, “Amen,”—Mong.]

<sup>364</sup> Ho ka thoeng ka mosali eo ea lutseng mono, a ntse a rapella nthoana... Ngoana eo o jeoa ke maemo a mali? U lumela Molimo a tla folisa ngoana? Ke hantle, u ka e fumana.

<sup>365</sup> Hoo ho teile mofumahali eo, hantle—hantle pela hao mono. O lutse mono a ntse a rapella maemo a linerefe, ke hantle,

haufi le uena. Hape, u na le moena ea jeoang ke maemo a kelello. Ke hantle. U na le 'mè ea jeoang ke leihlo. U lumele ka pelō eohle ea hao, Molimo o tla ba phelisa. Amen.

<sup>366</sup> Lea Mo lumela? [Phutheho e re, "Amen," e a nyakalla—Mong.]

<sup>367</sup> Ho ka thoeng ka uena mona, setulong sa bakuli? U a lumela na? Ea lutseng mono ke mora oa hao, ea sa tsoa rialo. Ke mora oa hao. U jeoa ke mofetše sefahlehong. U thatafalloa ho utloa. U ntse u batla kolobetso ea Moea o Halalelang. Ke hantle. Ha u ka e lumela ka pelō ea hao eohle! Ana u lumela sebakeng sa hae, mora? Ana u e lumela ka pelō eohle ea hao? Mo boelle eona ka tsebeng ea hae. Mo behe matsoho holimo, ho mo fumantša kolobetso ea Moea o Halalelang.

<sup>368</sup> Lea lumela Jesu Kreste ke eèna maobane, kajeno, le ka mehla? [Phutheho e a nyakalla—Mong.]

<sup>369</sup> Ana le lumela Messia, Messia e moholo oa Molimo, ea tsamaeang hara batho ba Hae? [Phutheho e a nyakalla—Mong.]

<sup>370</sup> Ana le ikemiselitse ho tèla tsohle le ho Mo latela? [Phutheho e a nyakalla—Mong.] Haeba le etsa, Mo phahamisetseng matsoho, le re, "Ke tla Mo latela. Ke tla Mo latela. Ke tla Mo lumela. Lentsoe ka leng leo A le buang, ke tla Mo lumela. Ke tla tsepamisa bophelo ba ka. Ke tla Mo sebeletsa." Molimo ako hauhele! Molimo a le hlohonolofatse.

<sup>371</sup> Balumeli ba ba kae ka mona joale? Phahamisa letsoho la hao. [Phutheho e a nyakalla—Mong.]

<sup>372</sup> Ba batlang ho Mo atamela haufi ba ba kae? Phahamisa letsoho la hao. [Phutheho e a nyakalla—Mong.] Bohle ba batlang ho Mo atamela le ho Mo amohela hona joale, O teng mona hantle. Bona ke Boteng ba Hae.

<sup>373</sup> Monna ea morao eo ea jeoang ke prostate, e felile, moena. Molimo o u folisitse lekhatheng leo.

<sup>374</sup> Khele, Le ea hohle ka mokhoa oo, ka hara Leseli, le likoloha hohle holima moaho. Ntho efe e ka etsahala hona joale. Re ka fumana pentekosta e 'ngoe, haeba le e lumela. [Phutheho e a nyakalla—Mong.]

<sup>375</sup> Emang ka maoto a lona, e mong le e mong oa lona. Phahamisetsa Molimo matsoho a lona. Mo roriseng. [Phutheho e a nyakalla e a rapela—Mong.]

<sup>376</sup> Kea U leboha, Morena Jesu. Rea U khumamela, Ntate, hoba U le Moloki oa rôna le Molimo oa rôna. U teng mona. U netefalitse Lentsoe. U Le kholisitse le le joalo. U Molimo, Messia, eèna maobane, kajeno, le ka mehla. Ea sa hloleheng, ntle le pelaelo, U sa le Morena Jesu eo. Ho bokoe Lebitso la Hae le halalelang!

<sup>377</sup> Lea Mo rata na? E re, “Amen.” [Phutheho e re, “Amen,” ‘me e a nyakalla—Mong.]

<sup>378</sup> Ba ba kae ba lona e leng balumeli joale? Phahamisa letsoho la hao. [Phutheho e re, “Amen.”—Mong.] Joale, Jesu o buile sena, ka Boeèna, “Mehlolo e tla tsamaea le ba lumelang ke eona ena. Ha ba beha matsoho holima bakuli, ba tla fola.” Ha se ‘na feela ea nang le Moea o Halalelang. U na le Oona, le uena. U molumeli, joale ka ‘na ha ke le molumeli. Joale tèlang pelaelo ea lona eohle.

<sup>379</sup> Bea motho e mong matsoho a hao u lumele hobane Molimo o tla folisa motho eo, ho latela Lentsoe la Oona. Haeba A tla boloka mofuta ona...Bea motho e mong letsoho, qala u ba rapelle, e re, “Morena, folisa motho eo.” Rapela ‘me u bone se etsahalang. U molumeli. [Phutheho e a nyakalla e a rapela—Mong.]

<sup>380</sup> Molimo o Matlaohle, ka Lebitso la Jesu Kreste re hlotse Liabolosi. Re mo khalemetsi, re mo hahotse re mo amohile matla. Re phekoloa ka maqeba a Morena Jesu Kreste.

[Phutheho e tsoella ho nyakalla le ho rapela—Mong.] 

*Ho Tèla Tsohle* SST62-0123  
(Forsaking All)

Molaetsa wona, ka Moena William Marrion Branham, o rerilwe sethatong ka Senyesemane ka Labobedi mantsiboya, Pherekong 23, 1962, mane Sunnyslope Assembly Of God, e Tempe, Arizona, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)